

萬有文庫

第一集一千種

王雲五主編

陸放翁集

(一十二)

陸游著

商務印書館發行

陸放翁集

(一十二)

陸游著

國學基本叢書

陸放翁集

劍南詩集

卷第七十四

書道室壁

餘生天地一飛蓬。學道年來似有功。習氣掃除空劫外。精神澡雪隱書中。種瓜谿父時時見。賣藥壺公處處同。莫謂與人緣苦薄。相隨拍手有兒童。

書志

蓬矢桑弧射四方。豈知垂老臥江鄉。讀書雖復具隻眼。貯酒其如無別腸。正馬揚鞭遊鄢杜。扁舟捩柂上瀟湘。自悲此志俱難豁。且復狂歌破夜長。

雪夕

目視瞢瞢左耳聾。吾衰略與昔人同。移燈自看蛉蜨影。取酒時澆礪礪胸。東郭稍能師順子。北山未敢笑愚公。空村雪虐風饕夜。袖手悠然政策功。

書枕屏

西域兜羅被。南番篤耨香。慣眠三丈日。不識五更霜。

又

心若冰將釋。貌如兒未孩。青城上官叟。時入夢中來。

又

甘菊縫爲枕。疎梅畫作屏。改詩眠未穩。聞雪醉初醒。

又

星斗闌干曉。窗扉矚曉明。金門與茅店。一種是雞聲。

二友

剩儲名酒待梅開。淨埽虛窗候月來。老子幽居得二友。人間萬事信悠哉。

寄五郎兼示十五郎

八十九十老可驚。白髮森然憎鏡明。身常遊岱尙少駐。書欲藏山殊未成。大兒爲國戍絕塞。季子伴翁親短檠。古人已矣不可作。夜闌撫几歎平生。

鄰曲相過

鄰曲集山家。相看一笑譁。扶行足蹠踣。半落齒槎牙。農圃乖生理。風霜感歲華。老來情話少。更盡此甌茶。

東窗

臘近寒何薄。秋衣著尙宜。年光祈雪見。節物賣燈知。川日初沈後。樓鐘欲動時。東窗對兒子。更與細論詩。

曉寒

落月銜山口。濃霜倒菊叢。青氈壓衾暖。軟火滿爐紅。起晚書虧課。愁多酒策功。杜陵如昔否。誰與問征鴻。

小雪

簷飛數片雪。瓶插一枝梅。童子敲清磬。先生入定回。

書感

夢裏逢無咎。天涯哭季長。吾生亦有幾。且復釣滄浪。

家釀頗勁戲作

千古英雄骨作塵。不如一醉卻關身。鼎來雖恨王陵戇。熟味方知孟子醇。試問浩歌遺世事。何如酣枕養天真。竹林嵇阮雖名勝。要是淵明最可人。

食薺糝甚美蓋蜀人所謂東坡羹也

薺糝芳甘妙絕倫。啜來恍若在峨岷。蓴羹下豉知難敵。牛乳抨酥亦未珍。異味頗思修淨供。祕方常惜授廚人。午窗自撫膨脝腹。好住煙村莫厭貧。

雜興

鋤草春愈茂。養草秋亦衰。不如兩置之。榮悴渠有時。

又

栖雞未旦鳴。粒食固宜報。林鳥何預人。嘒嘒欲誰告。

又

碩果墜池響。魚隊散無迹。空弦可落雁。此事蓋自昔。

又

滌硯欲其潔。磨鏡欲其明。願君試思之。與己孰重輕。

幽情

免歸又破六年閑。每寄幽情煙水間。清鏡不藏新白髮。芳樽猶惜舊朱顏。一編蠹簡心空在。百竇寒蘿債未還。莫爲岷峨勞夢想。故鄉隨分有名山。

醉歌

不癡不聾不作翁。平生與世馬牛風。無材無德癡頑老。爾來對客惟稱好。相風使帆第一籌。隨風倒柁更何憂。亦不求作佛。亦不願封侯。亦不須脫裘去換酒。亦不須賣劍來買牛。甲第從渠壓梁肉。貂蟬本自出兜鍪。雙理陰陽豈不好。纔得閑管晴雨如鴉鳩。辛苦築壘拂雲祠。不如吟歎風月登高樓。爾作楚舞吾齊謳。身安意適死即休。

霜冷

梅花消息動江邊。漸見新春換故年。莫道孤翁心似鐵。夜來霜冷透青氈。

讀書雜言

書亦何用於世哉。聖人之言如造化。巍巍地闢而天開。淵源虞唐至周孔。黃河萬里崑崙來。天不使諸儒爲戰國血。又不使六藝爲亡秦灰。豁如盲瞽見皦日。快若聾聵聞春雷。插空泰華起突兀。垂天雲漢森昭回。奈何後世獨不省。顧捨夷路趨邛邛。不知開眼蹈覆轍。乃欲歸罪車輪摧。福有基。禍有胎。一朝產禍吁。

可哀。

東嶺

雲罅漏斜日。駕言東嶺行。鴉翻半天黑。驚起一川明。小立照溝水。欲歸聞角聲。君看浮世事。何處異棋枰。

書戒

我幼事父師。熟聞忠厚言。治身接物間。要使如春溫。鞭朴不可弛。此語實少恩。但能交相愛。餘亦何足論。家貧賴奴婢。炊汲與應門。餘力具茗藥。夕飯或至昏。有過尙當貰。况可使煩冤。出仕推此心。所樂在平反。寧坐輓弱廢。促歸駕丘園。吾老死無日。作詩遺子孫。

書齋壁

煙水雲山千萬重。散人名號繼吾宗。買雛養就冲霄鶴。拾子栽成偃蓋松。父老年年同社酒。兒孫世世作春農。晚窗睡覺添幽事。臥聽蘭亭古寺鐘。

雪意

風吼江郊雪意濃。雲如兩陣決雌雄。山寒酒過平時量。窗黑書虧半日功。閑話更端茶竈熟。清詩分韻地爐紅。不須遽覓華胥路。更俟天花落坐中。

山房

何處合題詩。山房病起時。晨光鳥先覺。春信柳偏知。陋學勤何益。虛名悔可追。布衾新絮暖。惟與睡相宜。

晨起

助業文章謝不能。生涯分付一枝藤。身同湘浦孤舟客。心羨廬山下版僧。倦枕厭聞窗外雨。殘膏猶在壁間燈。草芝要及清晨服。深媿蠻童爲扣冰。草芝丹眉山史載之學士方。

兩雁

兩雁東西來。合羣以南翔。鏡湖接天台。海闊天茫茫。冥飛遠矰弋。長路諳冰霜。君看此氣象。豈復謀稻粱。正爾下杜陵。已復掠瀟湘。超遙萬里程。燕雀安能量。

書文稿後

上蔡牽黃犬。丹徒作布衣。苦言誰解聽。臨禍始知非。

題唐執中書樓

吾州唐子他州無。閉戶徧讀家藏書。志氣頗聞已山立。神仙固自多樓居。終日坐忘對燕几。有時出遊騎蹇驢。人生如此自可爾。勿羨新貴高門閭。

歲晚

雲暗郊原雪意稠。天公似欲富來甦。布衾歲久真如鐵。詎敢私懷一己憂。

又

不學空門不學仙。端居胸次自超然。絳人甲子君休問。新歲吾兒本命年。

又

戒殺家庖罷饋魚。病脾亦復禁寒蔬。莫慚鄰里嘲枯淡。出餽香粳玉不如。

又

小岫嶙峋炷寶熏。卷書閑對一窗雲。雁聲忽向天邊過。起立中庭看斷羣。

又

小塢梅開十二三。曲塘冰綻水如藍。兒童鬪采春盤料。蓼茁芹芽欲滿籃。

又

久矣功名不上心。亦無心要老山林。鹿門采藥悠然去。千載龐公是賞音。

雀啄粟

坡頭車敗雀啄粟。桑下餉來烏攫肉。乘時投隙自謂才。苟得未必爲汝福。忍飢蓬蒿固亦難。要是少遠彈射辱。老農輟耒爲汝悲。豈信江湖有鴻鵠。

老翁

老翁睡少知遙夜。貧士衾單怯苦寒。悶裏不嫌村酒薄。瘦來偏覺舊衣寬。籬門遇健時能出。書卷乘閑亦取看。深愧野人憐寂寞。放鋤相喚共朝餐。

寄子虞

人生恨無年。我老已爛熟。退耕鏡湖上。風雨有茅屋。事君闕補報。得此不啻足。餘年尙幾何。嫋嫋風中燭。大兒戍塞垣。馳馬佩矢箠。去家千餘里。辛苦就微祿。書來續三紙。語悲不忍讀。適弟在我傍。亦復淚溢目。門戶嗟日衰。持守賴家督。雪雲暗淮天。念汝方露宿。

雜詠

少日狂疎觸怒嗔。每緣憂患喪吾真。晚收咄咄書空手。卻作騰騰任運人。

又

得過一日且一日。安知今吾非故吾。裹手明窗讀周易。不辜香鉢一齋盂。

又

松昉燎火滿爐紅。罌粟煎湯到手空。試問齋居守丹竈。何如醉臥聽松風。

又

舊聞五岳多靈藥。晚遇高人得祕文。夢境此身常是客。幾時歸臥華山雲。

曉起折梅

織女斜河漏已殘。長庚配月夜將闌。小橋幽徑無人見。折得梅花伴曉寒。

累日濃雲作雪不成遂有春意

釀雪經旬竟不成。一霜卻作十分晴。雲歸岫穴千峯立。暖入郊原萬耦耕。莖葉離離豐歲候。梅花眷眷故人情。道傍孤店新醅熟。已有幽禽一兩聲。

晚晴出行近村閑詠景物

雪雲吹盡木陰移。正是先生曳杖時。老特行將新長犢。空桑臥出寄生枝。醫翁暮過囊探藥。筮叟晨占手布蓍。誰謂人間足憂患。未妨古俗自熙熙。

道室戲詠

道身隱太華，壯歲客青城。采藥何辭遠，燒丹久未成。傅生已醉死，韓子得狂名。猶有殘詩在，他年遺後生。

書感

人生百憂坐一官，况與羣飛接羽翰。兩具吳牛給耕足，三間茅屋著身寬。煮蒿悽愴會不免，簡儉寂默差可安。康莊坦坦不整駕，可憐平地生濤瀾。

又

舞非得譜拍拍錯，行未知津步步危。劫石消磨會當盡，太行突兀乃可移。清晨瓦釜煮藜粥，遙夜地爐燒豆其。此中正自有佳處，區區外慕寧非癡。

又

茅檐住穩勝華屋，芋糲味甘如大烹。靜觀萬事付一默，掃空白髮非黃精。丈人祠西鶴傳信，小姑山前鼉報更。興闌卻揮短棹去，曉渡清伊聽玉笙。

臘月

今冬少霜雪，臘月厭重裘。漸動園林興，頓寬薪炭憂。山陂泉脈活，村市柳枝柔。春甃吾何患，嘉蔬日可求。

雪作

今年冬暖異常時，造物收功乃爾奇。平野忽看吹雪片，清池俄復結冰澌。飛蝗掃地無遺種，瑞麥連雲有兩歧。想見市樓增酒價，深居袖手歎吾衰。

卽事

雲本無心木不材。平生得喪信悠哉。釣魚每過桐江宿。賣藥新從剡縣回。山圃萋萋晨灌溉。地爐芋栗夜燔煨。人情萬變吾何預。笑口何妨處處開。

或遣以兩大瓢因寓物外興

解葉爲衣草結廬。生涯正付兩葫蘆。名山歷徧家何有。塵念空來夢欲無。野鶴巢雲元自瘦。澗松埋雪定非枯。悠然但覓高樓醉。何處人間無酒徒。

歲未盡前數日偶題長句

老向人間迹轉孤。參差煙火出菰蒲。數畦綠菜寒猶茁。一勺清泉手自斟。穀賤窺籬無狗盜。夜長暖足有狸奴。歲闌更喜人強健。小草書成鬱壘符。

又

短褐蕭蕭一幅巾。明時乞與水雲身。平生不售屠龍技。投老真爲種菜人。釜粥芬香餉鄰父。闌豬豐腴祭家神。聯翩節物驚人眼。儼鼓停撾又見春。臘月八日。以粥相餽。北俗也。蜀人蒙豬供祭。謂之歲豬。

又

枰欄小弁野人裝。八十三年舊話長。真笑形骸無藉在。本知生世不牢強。茅檐啼鳥初相命。煙渚歸鴻漸著行。想得城中盛冠蓋。家家來往薦椒觴。

又

風號四野雲如墨。徂歲消磨不滿旬。瑞雪便應平地尺。野梅又報一年春。長河斷渡冰將合。古寺題詩手爲皴。僵臥閉門行路絕。安知今代獨無人。

又

漸近新年日愈長。不辭扶病舉椒觴。了無一事干靈府。只合終身住醉鄉。鬪釘春盤兒女喜。擣籩臘藥婢奴忙。蜀州白首猶癡絕。更爲梅花賦斷腸。

余得蘆竹拄杖於舍傍民家似蘆非蘆堅勁輕滑色如栗玉入手錯然微有聲它杖莫及作五字唐律記之

輕堅蘆竹杖。入用自龜堂。挺節冰霜後。論交歲月長。心空無寵辱。時異有行藏。老病登臨少。何妨日倚牀。八十四吟

新歲八十四。自宜形影孤。睡憑書檟相。愁賴酒枝梧。兒問離騷字。僧傳本草圖。孰言生計薄。種芋已成區。又

七十人稀到。吾過十四年。交遊無輩行。懷抱有曾玄。飲敵騎鯨客。行追縮地仙。城南春事動。小蹇又翩翩。歲暮

書房偷得蝸廬樣。僅僅能容老病身。紙被蒙頭方坐穩。卻愁轉眼又新春。又

淺色染成官柳絲。水沈熏透野梅枝。客來莫怪逢迎嬾。正伴曾孫竹馬嬉。

又

挹泉石鼎煎崖蜜。候火銅爐炷海沈。一坐便應論十劫。不知歲月去駸駸。

又

久衰豈是見人時。健忘偏于養性宜。噉飯著衣常苦嬾。爲誰欲理一團絲。

又

燕脂斑出古銅鼎。彈子窩深湖石山。老去柴門誰復過。天教二友伴清閑。

又

少慕浮名百種癡。老知世事盡兒嬉。從今春困不須賣。睡到日高三丈時。

書感

襁負客淮穎。髭髭逢亂離。中原遂乖隔。北望每傷悲。泛渭題新賦。遊嵩續舊詩。死生雖異世。此意未應移。

泛渭賦遊嵩詩見白歐二集。

書適

細讀養生主。長歌歸去來。山僧借水品。溪父送琴材。病退稀求藥。身閑日探梅。今宵喜無寐。嶮下有書回。

學道

學道知專氣。尊生得養形。精神生尺宅。虛白集中局。出岫孤雲靜。凌霜老柏青。晨興取澗水。漱齒讀黃庭。

舟中作

東浦菰蒲合。南莊桑柘繁。皆村落名。潮生無斷港。寺廢有頽垣。糴米尋山步。移舟泊水村。野人多舊識。相對兩無言。

得蜀信

齒髮凋零志氣衰。強臨尊酒祇成悲。少年半是投閑日。春事常當臥病時。憂患頗疑書作祟。功名不似老如期。青城舊友頻相約。歸養金丹尙未遲。

送蘇趙叟赴省試

關路誰非觀國賓。此君肝膽獨輪囷。故家遺俗欲墜地。博士議郎方要人。久矣扁舟弄江月。往哉駿馬踏京塵。勅中墨色如鴉溼。日待東歸一笑新。

新春感事八首終篇因以自解

九陌風和不起塵。平湖冰解欲生鱗。往來朝暮紛如蟻。得見新春有幾人。

又

興來遊衍不辭遙。吹帽風輕過畫橋。猩血未看開露蕊。麴塵先已上煙條。

又

一年最好早春天。風日初和未脫綿。坎坎圓聲賽神社。翻翻小繖下湖船。

又

憶到夔門正月初。竹枝歌舞擁肩輿。當時光景應如昨。綠鬢治中八十餘。夔府。

又

錦城舊事不堪論。回首繁華欲斷魂。繡轂金羈三十里。至今猶夢小東門。

又

玻璃江上柳如絲。行樂家家要及時。只怪今朝空巷出。使君人日宴嘉頤。眉州。

又

梁州陌上女成羣。銅綠春衫罽畫裙。相喚遊家園裏去。鞦韆高挂欲侵雲。興元。

又

烏藤卽是碧油幢。百萬天魔指顧降。酣枕不知霜竊瓦。下牀已見日烘窗。

自歎

晨興袖手觀空寂。飯罷寬腰習按摩。堪歎一生閑日月。爲身時少爲人多。

初春

春入陂湖已折冰。流年誰解繫長繩。土膏動後麥苗長。桑眼綻來蠶事興。稅足了無徵欠吏。飯香時有乞齋僧。開正父老頻占候。已決今年百稼登。

又

漠漠春寒罷對棋。霏霏春雨卻催詩。梅花一樹映疎竹。茅屋三間圍短籬。醉倒幸無官長罵。出遊自有老人期。年光滿眼吾何憾。又近吳蠶浴種時。

簡傳十八官漢獨

朋舊凋零盡。新交得雋人。文章諧律呂。議論足精神。甚欲邀聯騎。無如困負薪。蘭亭修禊近。爲記永和春。

開歲愈貧戲詠

謝事貧過筮仕初。歸裝僅有一柴車。笥衣盡典仍耽酒。困米無炊尙買書。澗底飽觀苗鬱鬱。夢中聊喜蝶。遶遶。商山幾許功名事。老子如今卻笑渠。

戊辰立春日

昨夜風搖斗柄回。典衣也復一傳盃。故人久作天涯別。新句空從枕上來。清鏡豈堪看鬢色。小園剩欲覓桃栽。頽然卻恨貪春睡。不盡城頭畫角哀。

又

臥聽城門出土牛。羅旛應笑雪蒙頭。但須晨起一卮酒。聊洗人間千種愁。處處樓臺多俠客。家家船舫待春遊。梅花未徧枝南北。定爲餘寒得小留。

早春出遊

地爐久厭撥寒灰。一笑眞成病眼開。不恨城笳催日落。且欣巷柳報春回。蹇驢破帽人人看。南陌東阡處處來。聞道禹祠遊漸盛。也謀隨例一持盃。

春寒

故歲無多雪。新春乃爾寒。柴車歸里社。茅舍老江干。客熟沽醪啜。孫癡索飯搏。更憐菰芥長。殊勝仰園官。

園居

欲出還中止。微陰卻快晴。檻花栽盡活。籠鳥教初成。身寄江湖久。心知富貴輕。還嬰吾所證。手自寫菴名。
近名小室曰還嬰。

郊行

山色埽石黛。江流漲麴塵。春晴不終日。老病動經旬。竹密有啼鳥。村深多醉人。東阡與南陌。處處寄閑身。
野望

偶攜一小豎。徙倚望南山。船笛爲誰怨。溪雲如我閑。洲長歸雁下。天迴暮鴉還。安得一竿去。終年煙水間。
又

日高霜漸釋。睡起髮猶蓬。小圃經行外。新蔬檢校中。水開聞躍鯉。天遠看飛鴻。粥熟還歸舍。吾生亦未窮。
午坐

茶盃凝細乳。香岫起微雲。樹影窗間見。禽聲屋角聞。流年易拋擲。舊學失鋤耘。師友今零落。何人爲運斤。

卷第七十五

自警

生世如夢境。淹速無定時。少壯不可恃。况汝迫耄期。五官及百骸。自揣日益衰。客來能送迎。要是強支持。百口皆新人。所至無舊知。紹興同朝者。掃地靡復遺。雖云窮耐久。造物豈汝私。餘日真幾何。得酒且伸眉。

春雨

春陰不肯晴。春雨斷人行。慘澹柴荆色。蕭條雞犬聲。香分豆子粥。美啜芋魁羹。猶勝梁州路。蒙氈夜下程。

春寒

冉冉年華過上元。梅花如雪照江村。雲歸翠竇初收雨。人怕清寒嬾出門。香燼已殘爐未冷。客談方劇酒重溫。尙嫌塵境妨幽致。過埭船聲暮正喧。湖桑埭去弊廬里許。

自喜

了了復惺惺。著龜未是靈。閑中有富貴。壽外更康寧。身備鄉三老。家傳子一經。春回元不記。出戶四山青。

又

身寄人間世。心常古鏡如。喚醒狂蝶夢。埽盡老狐書。年出鄉閭右。貧過仕宦初。村村是桃李。豈獨愛吾廬。

簡湖中隱者

夫子終年醉不醒。若爲問我故丁寧。書因遣僕馱黃蘗。詩許登山斲茯苓。疇昔但知悲驥老。卽今誰不羨鴻冥。清宵定許敲門否。擬問黃庭兩卷經。

短歌示諸稚

流年去不還。老狀來無那。雖甚顏原貧。尙勝夷齊餓。再歸又六年。疲馬欣解馱。姑幸簞轡空。敢復希豆莖。好山嬾出遊。敗屋得偃臥。飢能儲粟盎。病亦有藥裹。酒蟻溢罇罍。茗雪落小礪。香火失惰偷。編簡謹程課。豈惟洗幻妄。亦以起衰懦。向來名宦事。回首如棄唾。義理開諸孫。閱閱待其大。賢愚未易知。尙冀得一個。

如其盡爲農，亦未可弔賀。歸耕豈不佳？努力求寡過。

王子猷謂竹爲此君白，樂天謂酒爲此君余。野處無客，每對竹獨酌，得小詩

新種疎篁對小軒，旋沽薄酒實空尊。門無車轍亦何恨，有此兩君堪與言。

會稽行

我欲遊蓬壺，安得身插羽。我欲隱嵩華，歎息非吾土。會稽多名山，開跡自往古。豈惟頌刻秦，乃有廟祀禹。山形舞鸞鳳，泉脈流鍾乳。家家富水竹，處處生蘭杜。方舟泛曹娥，健席拂天姥。朱樓入煙霄，白塔臨雲雨。修梁看龍化，遺箭遣鶴取。茶薺可作經，楊梅亦著譜。湖蓴山蕨輩，一一難遽數。終年遊不厭，冰玉生肺腑。誦詩有樵童，乞字到俚嫗。况復青青衿，盛不減鄒魯。古詩三千篇，安知闕吳楚。土風聊補亡，吾言豈夸詡。

野飲

春雨行路難，春寒客衣薄。客衣薄尚可，泥深畏驢弱。溪橋有孤店，村酒亦可酌。臝莖小甑炊，丹柿青篾絡。人生憂患窟，駭機日夜作。野飲君勿輕，名宦無此樂。

作野飲詩後一日復作此篇反之

世事如海沙，巧曆不能數。身居憂患中，殆若墮窞虎。又如住敗屋，岌岌日撐拄。中夜風雨至，摧壓固其所。孰能知其然，徒義以爲主。要于一念間，不敢欺仰俯。兢兢日三省，寧可自莽鹵。君看昔先師，乃媿不若禹。

春晴

雨斷雲歸兩作晴，夕陽鼓角動高城。客愁正得酒排去，草色直疑煙染成。鶯爲風和初命友，鷗緣水長欲

尋盟不須苦問春深淺。陌上吹簫已賣餠。

又

常年春日少春晴。拂面今朝暖吹輕。水閣家家橫小舫。園亭處處聽新鶯。桃花不管詩人老。菖葉空催野叟耕。自笑此生餘幾許。銅駝荆棘尙關情。

遣興

莫笑龜堂礪硯胸。此中元可貯虛空。尙饒靈運先成佛。那計辛毗不作公。采藥偶逢丹井客。買蓑因過玉霄翁。不須更問歸何許。散髮飄然萬里風。

又

我是仙蓬舊主人。一生常得自由身。退歸自合稱山長。變化猶應侍帝晨。得酒不妨開口笑。學人難作捧心顰。塵中且復隨緣住。又見湖邊草木新。

開歲屢作雨不成。正月二十六日夜。乃得雨。明日行家園有賦。

東風催雨破天攄。行圃歸來剩解顏。百草吹香蝴蝶鬧。一溪漲綠鷺鷥閑。老來每歎論心少。貧甚方知覓醉艱。猶賴籃輿無恙在。呼兒結束入南山。

書屋壁

築室鏡湖濱。于今四十春。放生魚自樂。施食鳥常馴。土潤觀鋤藥。燈清論養真。桃源處處有。不獨武陵人。

又

鳥道經行穩。巢居臥起寬。鹿衣裁短褐。龜屋製危冠。舊幕橋中散。今師靖長官。蛟龍雲雨上。未必勝泥蟠。

與兒孫同舟泛湖至西山旁憩酒家遂遊任氏茅菴而歸

過埭維舟古柳根。卻扶拄杖入煙村。印泥接迹牛羊過。投宿爭林鳥雀喧。酒保殷勤邀淪茗。道翁偃偻出迎門。郊居不與人間事。惟有耕桑得細論。

日暮自大滙村歸

筍輿伊軋暮山昏。水敗陂塘路僅存。出谷鐘聲知過寺。隔林人語喜逢村。廟壩荒寂新犁地。堤草淒迷舊燒痕。兒子念翁霜露冷。遙持炬火出柴門。

八十四吟

八十仍逾四。遲留未告行。筮言災退散。醫賀脈和平。耕牧猶能力。癡頑每自驚。所嗟經學廢。心媿濟南生。

晚步至湖上

柴車無與駕。篷艇亦須人。賴有拄杖子。能扶羸病身。雲山翠屏合。煙月玉鉤新。蕭散湖塘路。微風吹葛巾。

春陰

窗昏不見字。今日罷觀書。迹寄浮生內。心遊曠劫初。太山均蟻垤。聖域亦蘧廬。兀坐還成倦。荒畦去荷鋤。

題野店壁

斷橐投衣囊。殘壺挂馬鞍。寺荒尋店久。橋敗涉溪寒。道里逢人問。題名拂壁看。平生慣行役。隨處得加餐。

題寺壁

菴居渾似罷參僧。除卻癡愁百不能。意倦有時憑曲几。興來隨處曳枯藤。雲山直去寧須伴。薜磴高攀不計層。聞道鼉鳴天欲雨。松門小住看雲興。

題幽居壁

青山四抱路盤紆。天與先生卜草廬。雲冷數聲聞斷雁。溪清百尺見遊魚。新醪薄薄閑尋醉。殘髮蕭蕭悶憶梳。莫謂躬耕便無事。百年京洛尙丘墟。

又

聲利場中偶解圍。悠然高枕謝招揮。山前曳杖尋僧去。林下收菴送客歸。城市氛埃那許到。比鄰煙火自相依。纓冠束帶前身事。散髮今惟勃落衣。

思夔州

老來百念盡消磨。無奈雲安入夢何。壯憶公孫劍器舞。愁思賓客竹枝歌。又

武侯八陣孫吳法。工部十詩韶護音。遺蹟故祠春草合。略無人解兩公心。梅開絕晚有感

又

年年踏雪探梅開。二月今年始見梅。從此逢春心轉嬾。小詩不擬覓花栽。尋梅不負雪中期。醉倒猶須插一枝。莫諱衰遲殺風景。卷中今歲欠梅詩。

園中晚飯示兒子

一飽何心慕萬鍾。小園父子自相從。蚍蜉布陣雨將作。蛺蝶成團春已濃。澗底束薪供晚爨。街頭糴米續晨舂。盤餐莫恨無兼味。自繞荒畦摘芥菘。

自詰

修行力量淺。觸事常寡悵。端居本無事。奈此百憂攻。今晨默自詰。世豈不汝容。漱濯臨清流。歎歌蔭長松。緩步有夷途。遠眺多奇峯。野叟時相尋。村酒亦自釀。于道忽少進。一掃芥蒂胸。轉釜本常情。寧說飯後鐘。

野飲

農事未興思一笑。春薺可采魚可釣。霏霏小雨忽已晴。堤上相攜踏殘照。村場酒薄亦有力。把醖相娛不辭酬。眼花耳熱言語多。霍然已醒如過燒。人生百年會有盡。世事萬變誰能料。酒空人散寂無聲。爲君試作蘇門嘯。

茆亭

讀罷楞伽四卷經。其餘終日坐茆亭。靜聽溪碓舂雲母。細斲松根采茯苓。大道粗嘗聞海若。高情未至媿山靈。寒泉新瀝甘于乳。晨起何妨挈半瓶。

身世

身世飄然似斷雲。時人誤許與斯文。旋償碑債動千里。強理詩情無一分。子美舊悲殘酒炙。幼安今老白襦裙。餘生自喜渾無事。清夜銅爐炷寶熏。

家有兩瓢分貯酒。藥出則使一童負之。戲賦五字句。

長物消磨盡。猶存兩大瓢。藥能扶困憊。酒可沃枯焦。童負來山店。人看度野橋。畫工殊好事。傳寫入生綃。

禹寺

禹寺荒殘鐘鼓在。我來又見物華新。紹興年上曾題壁。觀者多疑是古人。

旅遊

壯志蹉跎雪滿頭。久將餘日付滄洲。閑雲不入老人夢。鄰笛似知孤客愁。小築聊須傍蘭渚。片帆那復到樟樓。生涯草草真堪笑。三十年來一破裘。

又

本自無心落市朝。不妨隨處狎漁樵。螺青點出暮山色。石綠染成春浦潮。縣驛下時人語鬧。寺樓倚處客魂消。流年不貸君知否。素扇團圓又可搖。

貧歎

貧到今年極。蕭然四壁家。弊袍生蟣蝨。粗飯雜泥沙。浩浩乾坤大。茫茫歲月賒。故鄉煙水窟。別擬卜生涯。

東窗

九折危途寸步艱。至今回首尙心寒。元來自有安身處。茆屋三間似海寬。

又

才薄常爲世俗輕。還山力不給躬耕。卽今贏得都無事。袖手東窗聽雨聲。

又

俗事紛紛意不攄。兀如頭垢念爬梳。東窗且復焚香坐。閑看微雲自卷舒。

又

寂寂東窗午夢殘。更堪春雨作春寒。蠻童未報煎茶熟。一卷南華枕上看。

近村

家居每思出。出亦無與遊。江山豈不佳。乃復生我愁。不如適近村。家家業農疇。深巷鳴雞犬。長陂下羊牛。棗熟稻當穫。桑落酒可篋。寧無賓祭須。柿栗良易求。醫翁日過門。得藥疾自瘳。婚嫁不出村。百世加綢繆。我來每絕歎。恨不終歲留。人生正應爾。底事須王侯。

石帆山下作

石帆山下古苔磯。回首人閒萬事非。能飲上池何患死。不營尺宅欲安歸。寒龜瑟縮搢牀老。倦鶴翩遷帶箭飛。堪笑年來殊省事。就憑樵女綻春衣。

旦起

殘燈冷火待窗明。稍覺今朝病體輕。已賴林鳩知宿雨。更煩簷鵲報新晴。

又

地爐晨起撥寒灰。困睫濛濛尚嬾開。正倚蒲團覓殘夢。一聲啼鳥又驚回。

書況

自從請老鏡湖濱。萬事不關林下人。鴉去鴉歸還過日。花開花落又經春。官微也過千重浪。身在依然一幅巾。晨突有煙吾事了。濁醪不復惱比鄰。

閑中戲賦村落景物

遊宦才能薄。還山日月長。買牛捐寶劍。取酒解金章。泉脈疏供啜。松肪煉按方。北窗貪兀傲。南陌喜彷徨。僧過傳蒼法。醫來寄藥囊。泛舟經姥廟。策蹇上僧塘。嬾似嵇中散。癡如顧長康。人間須掃迹。隨處是羊腸。諸廟僧塘皆湖上地名。

又

覆篠初成屋。編荆旋作門。孤雲生釣瀨。微雨過基軒。柳種來傍縣。族子爲取柳本于餘姚茅氏。花栽乞近村。石欹聊可坐。地褊不成園。酒榼剝楓癭。香爐斷竹根。海鷗呼可下。隴鳥教能言。搏飯迎雙鶴。聯緇繫小猿。山家雖寂寞。隨事有盤飧。

予好把酒常以小戶爲苦戲述

我非惡旨酒。好飲而不能。方其臨觴時。直欲舉斗升。若有物制之。合卺已不勝。豈獨觀者笑。心亦甚自憎。正如疾逆虜。憤切常橫膺。踴躍忽衰老。何由效先登。上天無長梯。繫日無長繩。可歎固非一。壯志空飛騰。

春日對花有感

天天枝頭花。鬱鬱地上草。方春萬物遂。我乃獨衰槁。少時喜方藥。晚亦學黃老。又非愛名宦。壯歲迹已掃。如何過八十。尙復未聞道。偃行阡陌間。齒搖而髮縞。名山可巢居。決去恨不早。宴坐精思牀。猶能養梨棗。

出遊遇雨而返

柴門方出雨霏霏。未到湖邊促駕歸。深炷爐香掩屏臥。誰知不爲溼春衣。

又

荒山前頭野水邊。東行西行不自憐。天公豈亦哀老子。風雨留教終日眠。

記閑

白雲堆裏看青山。猿鳥爲鄰日往還。黃綺後身應我是。再來依舊一生閑。

二感

狸奴睡被中。鼠橫若不聞。殘我架上書。禍乃及斯文。乾鵲下屋簷。鳴噪不待晨。但爲得食計。何曾問行人。情得暖而安。飢得飽而馴。汝計則善矣。我憂難具陳。

題柴言山水

陰陰山木合。幽處著柴荆。喧中有靜意。水車終日鳴。春。

又

懸水三十仞。疾雷聞數里。正暑凜生秋。倚杖者誰子。夏。

又

高秋風雨天。幽居詩酒地。君看此氣象。其可折簡致。秋。

又

草亭臨峭絕。霜嶂起嶙峋。危磴儻可上。老夫思卜鄰。冬。

草亭獨坐

掃地垂簾坐草亭。東風吹頰醉初醒。睡蛇死後魔無力。疾豎降來藥有靈。在手殘梅香淡泊。傍檐幽鳥語丁寧。老人不是神通妙。世事元來要飽經。

修居室賦詩自警

荒園二三畝。敗屋八九間。初至如逆旅。忽逾四十年。屋日已朽蠹。我老不自還。茅可刈之野。木可伐之山。尙復不能具。日夜憂其顛。况我虛幻身。念念隨化遷。齒墮髮亦縞。鏡中失朱顏。其危甚于屋。何恃能牢堅。豐汝梨與棗。養汝汞與鉛。防疾如待敵。愛氣如守關。謀于履霜初。懼在橫流前。書紳銘席端。雖老尙可全。

遜迹

遜迹荒村慣忍貧。秋毫不使喪其真。家居亦以古爲鑑。事過始知天勝人。臨食致思方下箸。讀書有得每書紳。放翁耄矣當知幸。布褐藜羹畢此身。

春晴登小臺

不管筇枝破綠苔。閑穿萬竹上荒臺。幽花經雨自開落。啼鳥喜晴時去來。河岸家家裝彩舫。兒曹處處唱青梅。誰知老子癡頑甚。看改新元十一回。

魯墟舟中作

春浦南來元不到。畫橈偶復入鷗羣。人家遠火林間見。船底微波枕上聞。山口正銜初出月。渡頭未散欲

歸雲錦囊詩草新寥落得句猶堪寄一欣。

貧病戲書

得米還憂無束薪今年真欲餓生塵。椎奴跣婢皆辭去始覺盧仝未苦貧。

又

頭痛涔涔齒動搖。醫驕折簡不能招。亦知客疾無根柢少健還能起負樵。

又作二首自解

盡日溪邊艇子斜。治生不種邵平瓜。已分鄰舍紅蓮米更啜僧房紫筍茶。

又

靈府安平四體和。經時止酒頰常酡。老生要是常談爾吐納餘閑卽按摩。

挾書一卷至湖上戲作

買地孤村結草廬。蕭然身世落樵漁。一編在手君無怪曾典蓬山四庫書。

謝客相過

我力日愈衰人事不敢倡。窮巷春多泥何以稅客鞅。諸君顧何取勤懇問亡恙賦詩代尺書跂望徒悵悵。

書幸

土盎常餘菜山庖不絕煙。罷醫翻少疾無術自長年。小舫煙波宅閑身陸地仙。東窗最佳處日對坐忘編。

書歎

髣髴承學紹興前。歷看人間七十年。撲滿終歸棄道側。鷗夷猶得載車邊。釣船夜泛吳江月。醉眼秋看楚澤天。造物未容書鬼錄。殘春又藉落花眠。

古興二首各五韻

草衰何預人。每起徂年悲。日月纔幾何。又見青青時。青青雖滿眼。行矣當復衰。盛衰還無端。其理可前知。人生死則已。千載無還期。

又

月出橫林上。宿鳥無定枝。物生各畏禍。所託輒蹈危。老人倚壁坐。大鼯驚羣兒。雖云差自適。見事亦太遲。猶有一可喜。永謝世俗羈。

病中有述二首各五韻

萬事有常理。中智皆能知。禍福如白黑。不待諏蓍龜。疾患初萌芽。未有旦夕危。每能自省察。百鬼安能窺。一忘生百疾。速死乃自貽。

又

爲國恃久安。變起最莫測。釋楚爲外懼。此實計之得。吾儕學養生。事事當自克。老無聲色娛。戒懼在飲食。要須銘盤盂。下箸如對敵。

黃鶉吟

嗟哉黃鶉。一何陋。性喜隱翳藏荒囿。煙深翅重飛不起。鳴聲殷殷知雨候。夜與妖鵲羣。又似惡白晝。羽毛

不足辱彈射。滋味不足登俎豆。捕之既無用。鬻之又不售。譬之人以支離而全。木以擁腫而壽。若予者智不能知農圃。學不能舉孝秀。名不諱世。動得嘲詬。是亦天下不材之尤。尙何議乎汝後。

恩封渭南伯。唐詩人趙嘏爲渭南尉。當時謂之趙渭南。後來將以予爲陸渭南乎。戲作長句。

老向人間久倦遊。君恩乞與渭川秋。虛名定作陳驚坐。好句真慚趙倚樓。棧豆十年羈病馬。煙波萬里著浮鷗。就封他日輕裘去。應過三峯處處留。

幽居

宿志在人外。清心遊物初。猶輕天上福。那習世間書。薺菜挑供饌。槐芽采作葅。朝晡兩摩腹。未可笑幽居。肩輿至湖桑埭。

籃輿隨意出衡門。日已沉山野未昏。小市叢祠湖上路。短垣高柳埭西村。麥苗極目無閑土。塘水平堤失舊痕。明詔裕民聞屢下。老農何以報君恩。

半俸自戊辰二月置不復言作絕句

又
力請還山又幾年。何功月費水衡錢。君恩深厚猶慚懼。敢向他人更乞憐。

俸券新同廢紙收。迎賓僅有一絕裘。日鋤幽圃君無笑。猶勝牆東學僮牛。

頭風戲作

出門處處皆桃李。我獨呻吟一室中。只道有詩敲瘡鬼。誰知無檄愈頭風。

茅齋

茆齋雖絕小。老子策新助。磴落霏霏雪。爐生裊裊雲。心將鷗共遠。巢與鶴中分。幾許人間事。吾廬寂不聞。

耕桑

老病雖俱至。耕桑亦未遲。兒童誇犢健。婦女閔蠶飢。月落鳥鳴夜。燈殘鼠留時。但當尋熟睡。萬事不須思。

春遊

方舟衝破湖波綠。聯騎蹋殘花徑紅。七十年間人換盡。放翁依舊醉春風。予年十四始到禹祖龍瑞。今七十年矣。

又

熟食從來少天色。東吳況是足春寒。城南藉草可痛飲。安得酒腸如海寬。

又

蘭亭路上換春衣。梅市橋邊送夕暉。聞有水仙翁是否。輕舟如葉槳如飛。

又

沈家園裏花如錦。半是當年識放翁。也信美人終作土。不堪幽夢大匆匆。

蔬飯

春事已闌珊。山村未褪寒。筍生初入饌。薺老尙登槃。僧飯時分鉢。園蔬不仰官。枯腸更禁撓。姑置密雲團。

海棠歌

我初入蜀鬢未霜。南充樊亭看海棠。當時已謂目未覩。豈知更有碧雞坊。碧雞海棠天下絕。枝枝似染猩猩血。蜀姬豔粧肯讓人。花前頓覺無顏色。扁舟東下八千里。桃李真成僕奴爾。若使海棠根可移。揚州芍藥應羞死。風雨春殘杜鵑哭。夜夜寒衾夢還蜀。何從乞得不死方。更看千年未爲足。

園中作

湖曲舊誅茆。松陰近結巢。安閑多熟睡。衰退少新交。雨漬丁香結。春生豆蔻梢。良晨不把酒。新燕解相嘲。

書意

整書拂几當閑嬉。時取曾孫竹馬騎。故故小勞君會否。戶樞流水卽吾師。

又

人生祇要常無事。忍欲紛紛喜見侵。贈子祕傳安樂法。秋毫莫遣動吾心。

又

離角緋桃落漸稀。晚風吹去點苔磯。揮金豈必如疎傅。二畝春秋也是歸。

晚春

世事紛紛不足論。流年度似海濤翻。莫因齒髮悲殘景。且喜柴荆是故園。千里桑麻無曠土。數家雞犬自成村。鄰翁過我誇秧信。雨後春泥一尺渾。

又

莫笑花前醉墮巾。放翁又看一年春。尋巢燕熟頻穿戶。釀蜜蜂喧不避人。楚廟羔豚初散社。稽山箬蕨正

嘗新。要知不負年光處。南陌東阡自在身。

卷第七十六

湖上

綸巾羽扇影翩翩。湖上徜徉莫計年。桃李已忘疇昔分。禽魚猶結後來緣。山前墟市初多筍。江外人家不禁煙。莫恨幽情無與共。一雙白鷺導吾前。

卽事

成敗歸青史。悲驩付浩歌。病從今歲減。詩比去春多。高枕觀浮世。持盃養太和。功名亦易爾。難負此漁蓑。

東籬雜書

芳草初侵路。青梅已破枝。雨來鳩逐婦。日出雉求雌。莽莽江湖遠。悠悠歲月移。老人觀物化。隱几獨多時。

又

桃李成塵土。來禽始著花。病夫猶枕上。春事又天涯。巷陌鞦韆夢。簾櫳燕子家。野僧來問訊。強把半甌茶。

又

老厭人間事。閑知造物功。草生三徑綠。花發一窗紅。幽境囂塵外。流年嘯傲中。所嗟儕輩盡。論舊只春風。

又

身與春俱老。愁隨日漸長。簾櫳聽語燕。澗谷擷幽芳。酒榼常從後。詩囊亦在傍。閑行無定處。隨意據胡牀。

山行

山鳥啼孤戍。煙蕪入廢亭。隄成陂水白。雨細稻秧青。草市少行旅。叢祠多乞靈。最憐投宿處。微火暮晶荧。

稻陂

白水滿稻陂。投種未三宿。新秧出水面。已作纖纖綠。年來殘俸絕。所望在一熟。見之喜欲舞。不復憂半菽。想當西成時。載重壓車軸。病齒幸已牢。往矣分社肉。

雨夜思子虞

兀兀過遙夜。悠悠擁破衾。峭寒侵病骨。殘雨滴愁心。人別易千里。書來真萬金。醉眠差似可。誰與伴孤斟。

醉中示客

四座無譁聽我歌。百年生計一煙蓑。清尊潏潏猶狂在。白髮蕭蕭奈老何。遠適安能縮地脈。高眠聊足養天和。吾徒看盡人間事。莫愛車前印幾窠。

散髮

散髮垂肩嬾更簪。一窗竹水對蕭森。從來恥作資身策。老去終懷報國心。雷起鼻端秋枕石。泉鳴指下夜橫琴。不緣羸病愁迎客。經歲何人肯見臨。

病中觀辛夷花

餘生垂九十。一病理一衰。旬月不自保。敢作期歲期。粲粲女郎花。忽滿庭前枝。繁華雖少減。高雅亦足奇。持盃酌花前。事亦未可知。明年儻未死。一笑當解頤。

小艇

放翁小艇輕如葉。只載蓑衣不載家。清曉長歌何處去。武陵溪上看桃花。

雜題

賀公在朝雅吳語。莊鳥仕楚猶越吟。我幸歸休在閭巷。燈前感慨不須深。

又

茆屋三間已太奢。柴乾米白喜無涯。非賢敢竊優賢祿。願折蓴絲與蕨芽。半俸自春初不復敢請。

又

野花紅碧自爭春。村酒酸甜也醉人。解放船頭便千里。不愁無處著閑身。

又

湖隄疎瘦水楊柳。村舍殷紅山石榴。推戶本來隨意入。乞漿因得片時留。

閑遊

柴車去去度橫陂。正是春殘入夏時。果熟多藏新密葉。鶯啼偏占最高枝。迷途每就傭耕問。薄飯時從逆旅炊。隨意題詩無傑思。還家猶足詫吾兒。

病起初夏

頭風間作已全輕。山雨雖頻卻快晴。窗外時時度花片。林梢處處送鶯聲。地偏無客談閑事。麥熟逢人樂太平。不爲衰遲辜節物。一甌半酪薦朱櫻。

衡門獨立

春歸堪笑又忽忽。水白秧青細雨濛。
溪鳥低飛畫橋外。路人相值綠陰中。
宋清藥券貧來積。李賀詩囊病後空。
惟有劇談能一洗。芳尊那得故人同。

雨夜

吳中地多雨。海角客常愁。
羸疾須醫藥。殘年憶輩流。
解裝孤驛晚。振柁小江秋。
莫起瀟湘興。無才賦遠遊。

山麓

草合路如線。偶隨樵子行。
林間遇磐石。小憩看春耕。

北齋

質衣葺北齋。欹壞略撐拄。
窗扉則虛名。聊足度寒暑。
獨學無與論。推覈實勞苦。
審觀古人意。十亦得四五。
無功與子光。相可豈待語。
一床寬有餘。高臥聽簷雨。

禽言

架犂架犂。南村北村雨淒淒。
夜起飯牛雞未啼。日暮矻矻行千畦。
沒足勿恨一尺泥。西成收薄汝噓臍。
架犂架犂。

又

拔筍拔筍。入簍不辭風雨窘。
養成會見高拂雲。取供口腹初不忍。
獨持兩把慰倚門。慈顏一笑如春溫。
拔筍拔筍。

又

老翁老尚健。打麥持作飯。終歲隴畝間。勞苦孰敢怨。人生爲農最可願。得飽正如持左券。碓舂樵爨小飯。香豈不勝汝耗太倉。打麥作飯。

又

堂前捉續子。力作忘朝餐。鵝黃雪白相照耀。插茅作簇高如山。蠡女採桑至煮繭。何暇膏沐梳髻鬢。纒成蜀錦與楚縠。舞妹纏頭不論束。堂前捉續子。

道院偶述

景德祥符草野臣。登封曾望屬車塵。已經成住壞空劫。猶是東西南北人。

又

憶在青城煉大丹。丹成垂欲上仙班。飄零未忍塵中老。猶待時平隱華山。

初夏書感

春與人俱老。花隨夢已空。遊蜂黏落蕊。輕燕接飛蟲。桑悴知蠶起。牲肥養麥豐。爲農當自力。相戒勿忽忽。

贈邢芻甫

割愁何處有并刀。傾座誰能奪錦袍。堪笑陸翁鄰鬼錄。尙推邢友擅人豪。杜門雖少客載酒。落筆已能奴命騷。安得相從北窗下。丐君膽馥與殘膏。

昔從戎南鄭日。范西叔爲予書小臥屏。今三十有八年矣。悵然有懷。

梁州風月今何在。每憶朋儔淚濺裾。戎幙已如它世事。素屏猶對故人書。

小雨

川雲疊疊密如鱗。山雨霏霏細似塵。未必便爲耕隴喜。天公分付與詩人。

遣懷

出澤荒寒外。門庭寂寞中。厭聞鳩喚雨。常羨鳴知風。逆境嗟行徧。閑愁幸埽空。今晨有奇事。簫鼓賽年豐。

又

風月資吟嘯。漁樵約往還。貧猶能釀酒。病不廢遊山。亂石臥牛馬。流泉鳴珮環。豁除羈旅日。猶有半生閑。

初夏喜事

箕穎元非爭奪場。瀟湘自古水雲鄉。采茶歌裏春光老。煮繭香中夏景長。斂版早知遊宦惡。署門晚悟世情常。茹芝卻粒雖無術。散髮猶當效楚狂。

夢蜀

自計前生定蜀人。錦官來往九經春。堆盤丙穴魚腴美。下箸蛾眉楫脯珍。聯騎雋遊非復昔。數編殘藁尙如新。最憐栩栩西窗夢。路入青衣不問津。

閑遊

一見溪山病眼開。青鞵處處蹋蒼苔。平生長物埽除盡。猶帶筆牀茶竈來。

又

好事湖邊賣酒家。杖頭錢盡慣曾賒。壚邊爛醉眠經日。開過紅薇一架花。

初夏

牀有蒲團坐負牆。室無童子自燒香。人圖作佛雖堪笑。我愛逃禪亦太狂。櫻筍久忘晨入省。蓴鱸猶喜老還鄉。汗青未絕茶經筆。那暇投文弔戰場。

又

梅子生仁已帶酸。楝花墮地尙微寒。室無長物惟空榻。頭不加巾但小冠。蠶簇倚牆絲盡起。稻秧經雨水陂寬。郊原清潤身差健。剩欲閑遊一跨鞍。

野興

東望城闌十里遙。野人生計日蕭條。棋枰棄置機心息。肉食蠲除業境消。送藥時時過鄰父。放魚日日度溪橋。自憐愛物還成癖。門巷春來草沒腰。

又

涉澗穿林信意行。翠崖朱棧愜幽情。關關幽鳥將雛語。簌簌幽篁解籜聲。藉草一壺消永日。出門幾屐了平生。川雲正作遮山計。浩蕩南風又快晴。

自笑

宦途昔似伏轅駒。退處今如縱壑魚。手自埽除松菊徑。身常枕藉老莊書。郊居本自依農圃。社飲何妨逐里閭。白髮蕭然還自笑。風流猶見過江初。

喜晴

正厭鳩呼雨。俄聞鵲噪晴。路開知潦退。書展喜窗明。日透疎簾影。風傳暮角聲。兒童競相報。門有賣朱櫻。

過鄰曲

黃雲卷盡綠針齊。夏木陰陰滿古隄。耆老往來無負戴。比鄰問道有提攜。暑天漸近便餐酪。吳俗相傳尙繪縵。共喜豐年多樂事。扶歸先判醉如泥。

題蘇虞叟巖壑隱居

蘇子飄然古勝流。平生高興在滄洲。千巖萬壑舊卜築。一馬二僮時出遊。香斷鐘殘僧閣晚。鯨吞鼉作海山秋。極知處處多奇語。肯草吳牋寄我不。

縱筆

騎鶴翩翩過月傍。浩然風露九秋涼。忽聞捲地潮聲起。始覺江山近故鄉。

又

百尺松根結茯苓。千年長養似人形。誰知金鼎烹初熟。恰值山翁醉欲醒。

北窗卽事

衡茅隨力葺幽居。埽地焚香樂有餘。分食時能下檐鵲。作洲常悔誑池魚。遊歸又失相尋客。睡起重開未了書。袖手悠然便終日。不辭世俗笑迂疎。

又

北窗最與嬾相宜。世上紛紛了不知。露井甘寒初浚後。小山葱蒨乍晴時。粗餐豈復須鮭菜。蓬戶何曾設屐屨。幸有牀頭藤杖在。登臨未遽歎吾衰。

感物

提壺勸客飲。架犂課農耕。鳩方喜婦還。蟻又以族行。大化職雨暘。我窗更晦明。芸芸觀萬物。一笑了此生。園中把酒示鄰曲。

畏途半世困風波。老返家山得已多。野餉雖無食指動。村醪也解醉顏酡。夢殘正欲還君枕。棋罷那知爛客柯。松菊未荒風月在。應容老子且婆娑。

又

煮豆烹蔬當果殺。固應盃酌盡陶匏。池塘潏潏荷浮葉。門巷陰陰筍放梢。三畝荒園存故業。一編蠹簡得深交。弊廬經雨穿將徧。欲向村東自割茅。

書憂

時人應怪我何求。白盡從來未白頭。磅礴崑崙三萬里。不知何地可埋憂。

門外獨立

朝看出市暮看歸。數盡行人尚倚扉。要見先生無盡興。少須高樹挂殘暉。

感事六言

老去轉無飽計。醉來暫豁憂端。雙鬢多年作雪。寸心至死如丹。

又

黑犢養來純白。睡蛇死後安眠。但有漉籬可賣。不妨到處隨緣。

又

五尺童知大義。三家市有公言。但使一眠得熟。自餘萬事寧論。

又

麥熟與人同喜。虜驕爲國私憂。身似五更春夢。家如一宿山郵。

又

早歲已歸南陌。暮年常在東籬。短衣幸能掩脰。長劍何須拄頤。

又

高岸眼看爲谷。寸根手種成陰。一卷楚騷細讀。數行晉帖閑臨。

又

李白嶽崎歷落。嵇康潦倒粗疎。生世當行所樂。巢山喜遂吾初。

又

有飯那思肉味。安居敢厭茅茨。未論顏淵陋巷。老農自是吾師。

幽居記今昔事十首以詩書從宿好林園無俗情爲韻

總角入家塾。學經至爾詩。治道本耕桑。此理在不疑。今茲垂九十。謝事居海涯。戴星理農業。未歎筋力衰。

四月築麥場。五月瀦稻陂。秉火去螟蝗。磨刀剪棘茨。西成大作社。歌鼓樂聖時。

又

上世本爲農。輟耕業詩書。我少學不成。固應返其初。冥冥不自揣。鄉校參羣居。中歲偶拔擢。清班久趨趨。典奏入南宮。細書長石渠。及其乞身歸。舊業已丘墟。衰疾或小間。力尙給荷鋤。寄聲謝故人。毋爲笑迂疎。

又

我昔揮短楫。終年釣吳松。亦嘗攜長錢。采藥玉霄峰。爲計晚大繆。朝路偶見容。晨趨大明班。夜聽長樂鐘。白髮迫歸休。居然鮮歡悰。上恩許乞骸。一日收孤蹤。蓬茅略補葺。甌碓勤炊舂。故交零落盡。歲晚當誰從。

又

還鄉老未死。舉目少耆宿。邑屋亦或非。所餘但喬木。曩時列鼎家。今不飽半菽。盛衰迭變遷。何者非陵谷。羸然九十翁。世故見已熟。偶能達一理。萬事等破竹。布縫一稱衣。藜煮半釜粥。餘年更何爲。枕藉糟與麴。

又

癸亥辭脩門。拜賜散人號。一出非本心。歡喜歸祭竈。故鄉多名山。幸得遂所好。舟輿雖難具。信步亦可到。清溪無塵滓。奇峯有雲冒。雨墊林宗巾。風落孟嘉帽。豈惟狂故在。望遠亦未眊。一醉儻可謀。敢愛將軍告。

又

入蜀過匡廬。秋風宿東林。月出斷山口。滿窗松竹陰。裊裊一枝燭。道人語夜深。亦設麝果供。慰此羈旅心。猶恨非遠公。無酒遣我斟。明日下午去。歎息難重尋。回首四十年。駒隙何駸駸。舊遊不可到。悵望空長吟。

又

昔戍西陲時。憑高望中原。願欲乘天風。往弔綺與園。有志莫能遂。悵望商山魂。遙想山中人。歲時奠芳蓀。夕陽簫鼓散。高柳擁廟門。老來更事多。考古見本根。乃知當時事。禍福未易言。千載信悠悠。浩歎掩綠尊。

又

客舟挂煙帆。千里過楚都。七澤渺無際。大不數具區。浪翻出長蛟。雲拆浮天吳。峩峩來如山。碎船不須臾。江行幸已盡。三峽尤畏途。槎牙人饑殍。小失卽見屠。叩頭禱鬼神。已脫猶號呼。願君勤自勵。憂患何時無。

又

昔自京口歸。卜居得剡曲。地偏無市人。民淳有古俗。陋屋僅結茆。粗飯財脫粟。典衣以沽酒。九月未能贖。寧負翁子薪。恥售卞和玉。老身已如此。兒子亦碌碌。藏書幸無恙。自計不啻足。拾穗且浩歌。行矣墮鬼錄。

又

少小喜讀書。終夜守短檠。其實無甚解。不幸誤有聲。勞苦亦何得。空失東臯耕。暮年乃小黠。告歸學養生。采藥作遠遊。把釣適幽情。高樓笛數曲。小軒棋一枰。餘年置勿憂。不卿何由烹。

喜雨

入夏久不雨。旱勢已岌岌。蛙蛤徒自喧。蛟龍臥如蟄。何由白水滿。但守青秧泣。上天忽悔禍。川雲起呼吸。虛簷雨競瀉。平野苗盡立。兒停蹋轉車。婦免憂谷汲。人言雨非雨。乃是傾玉粒。移牀亦細事。敢歎屋漏澤。

初夏雜興

老子今朝不用扶。雨涼百病一時蘇。扇題杜牧故園賦。屏對王維初雪圖。把釣溪頭蹋湍瀨。煎茶林下置風爐。箇中莫謂無同賞。逋客能從折簡呼。

又

巾脫冠欹八尺牀。竹陰槐影有餘涼。隨風花墮殘棋上。引睡書拋捲枕傍。水長沙鷗向人熟。雨餘巢燕哺雛忙。尙嫌未愜幽情在。又喚漁舟渡野塘。

又

自斷殘年莫問天。吾儕何處不隨緣。家貧卻得身差健。夜短何妨晝熟眠。未歷名山采靈藥。且從同社樂豐年。賣絲糶麥償逋負。猶有餘錢買釣船。

又

繆算狂言悔莫追。杜門省事不妨奇。欲傾淡墨詩成後。縹緲烏巾浴出時。筇杖閑行穿密篠。繩牀移坐照清漪。眼邊好景真須惜。漸近浮生結局時。

又

趁雨東園去荷鉏。歸菴卻展讀殘書。幸能胸著雲夢澤。何恨家無擔石儲。水泛時須借篷艇。山行亦或命巾車。嬾心惟怕遊城市。非向交親故作疎。

又

終日頽然蠹簡中。門前煙水浩無窮。百年等是一枯塚。四海應無兩放翁。栗玉長枝挑苦筍。胭脂小把翦

防風地偏日永閑無事。擬著珍蔬譜一通。

對酒作

飲酒豪如卷白波。遣愁難似塞黃河。多聞只解爲身累。後死空令見事多。未試神仙餐玉法。且賡壯士入關歌。此心不道無人識。雪鬢蕭蕭奈老何。

獨坐閑詠

書生亦有功名願。與世無緣每背馳。一寸丹心空許國。滿頭白髮卻緣詩。

又

深掩柴荆謝世紛。南山時看起孤雲。殘年所幸身猶健。閑事惟求耳不聞。

水亭

水亭不受俗塵侵。葛帳筠牀弄素琴。一片風光誰畫得。紅蜻蜓點綠荷心。

又

莫道山翁老病侵。靜中理得舊傳琴。朝來有喜君知否。雨展芭蕉二尺心。

書興

占得溪山卜數椽。飽經世故氣猶全。入門明月真堪友。滿榻清風不用錢。便死也勝千百輩。少留更過二三年。湖橋酒美能來醉。一棹何妨作水仙。

書感

翟公冷落客散去。蕭尹譴死人所憐。輸與桐君山下叟。一生散髮醉江天。
又

驅山不障東逝波。一尊莫惜醉顏酡。斜風細雨苕溪路。我是後身張志和。

暑雨

欲雨未雨雷車奔。欲睡不睡人思昏。蠻童正報煮茶熟。忽有野僧來叩門。

又

草茂水長蛙羣鳴。涯深路壞人斷行。故侯老退守瓜壘。翠蔓黃花偏眼明。

池亭夏晝

造物寧非念老生。池亭幽事悉施行。羣魚聚散忽無迹。孤蝶去來如有情。小磴落茶紛雪片。寒泉得火作松聲。曲肱假寐翛然寤。不爲敲門夢不成。

又

茅舍蘆藩枕小灘。蕭森那復畏炎官。醉牀酒解香初過。嬾架書橫夢未殘。饒愛流匙菰米滑。渴便滿杓粟漿酸。兒孫幸有團欒樂。未覺浮生一笑難。

頃歲從南鄭屢往來興鳳間暇日追懷舊遊有賦

昔戍蠶叢北。頻行鳳集南。烽傳戎壘密。驛遠客程貪。春盡花猶坼。雲低雨半含。種畝多菽粟。藝木雜松栢。婦汲惟陶器。民居半草菴。風煙迷棧閣。雷霆起湫潭。城郭秦風近。村墟蜀語參。快心逢曠野。刮目望浮嵐。

考古時興感。無詩日每慙。嘉陵最堪憶。迎馬柳參參。

埽除小園未竟歸臥

竹葉埽仍落。莎根鋤更生。陰陽常代謝。今昔各施行。勛業須時至。衰榮忌力爭。徑歸差省事。高枕聽蟬聲。

暑中北窗晝臥有作

禦疾如治河。但當導之東。下流既有歸。自然行地中。養生如藝木。培植要得宜。常使無天傷。自有千雲時。我少本多疾。屢亦頻危殆。皇天實相之。警告意有在。中年棄嗜慾。晚歲節飲食。中堅却外慕。魔盛有定力。死生雖天命。人事常相參。茫茫九衢中。百禍起一貪。郊虛暑雨餘。巾墮脚不襪。高臥北窗涼。超然寄疎豁。

羈懷

羈懷不復耐悲歡。清鏡朝朝雪鬢繁。謝傅畏逢親友別。龐公思遺子孫安。殘骸累歲歸民伍。半俸今年上縣官。閉戶惟須學堅坐。不知更敗幾蒲團。

自貽

寒暑衣一稱。朝晡飯數匙。錢能禍撲滿。酒不負鴟夷。

又

家風本韋布。生事但漁樵。慣就下鄉食。莫煩東閣招。

又

癡孫護雀雛。饑僕放池魚。懷藥問鄰疾。典衣收舊書。

又

退士憤驕虜。閑人憂旱年。耄期身未病。貧困氣猶全。

卷第七十七

得雨霑足。遂有豐年意。欣然口占。

人事銷沉渺茫中。此身元合付天公。儒生可逐惟求忘。社酒常辭不怕豐。鬱鬱稻苗欣出穗。汪汪陂水告成功。老民莫道渾無用。能爲明時祝歲豐。

浴罷閑步門外而歸

兩扇荆扉數掩籬。幽人浴罷得娛嬉。南臨大澤風來遠。東限連山月出遲。沙上無泥藤屨健。水邊弄影葛巾欹。徑歸卻就東窗臥。要及蟬聲未歇時。

初晴

暑雨初收體爲輕。遠山盡出眼偏明。詩憑寫興忘工拙。酒取澆愁任濁清。綠樹有陰休倦步。澄溪無滓濯塵纓。老人本少凋年感。不奈江城暮角聲。

枕上

青絲玉井轆轤聲。露葉風枝鶉鴂鳴。造物未容閑到死。又從枕上得詩情。

又

冥冥梅雨暗江天。汗浹衣裳失夜眠。商略明朝當少霽。南簷風珮已鏘然。都下新作藥玉。風響如古玉環。希璜琬琤悉備。

讀史

馬周浪迹新豐市。阮籍興懷廣武城。用捨雖殊才氣似。不妨也是一書生。

今歲六月望後一日立秋故比常年涼意差早

九衢車馬困炎曦。正是山中散髮時。秋近梧桐已搖落。陰生蟋蟀最先知。稻陂水白寧憂旱。竈突煙青幸續炊。誰謂吾廬太岑寂。茶瓜亦有野人期。

異夢

山中有異夢。重鎧奮雕戈。敷水西通渭。潼關北控河。淒涼鳴趙瑟。慷慨和燕歌。此事終當在。無如老死何。

貧病

貧至今年劇。真無地置錐。判愁停貰酒。忍病罷迎醫。性嬾非關老。天窮豈坐詩。秋風還欲到。便可數期頤。

涉溪

揮汗欲成雨。聚蟲真若雷。山翁在何許。赤脚步溪來。

卽事

身向人間閱事多。杜門聊得養天和。盛衰莫問蕭京兆。壯老空悲馬伏波。日暮城樓傳戍角。風生嶺路下樵歌。君知此段神通否。豎拂能降百萬魔。

又

唐虞千載仰巍巍。太息儒生每背馳。經未盡亡君更考。古無不死我何悲。釣耕本是求賢地。宵旰今逢願治時。寄謝公卿各努力。爲吾君築太平基。

又

我愛湖山清絕地。抱琴攜鶴住茆堂。藥苗自采盤蔬美。菰米新舂鉢飯香。南浦風煙無限好。北軒雷雨不勝涼。舊交散落無消息。借問黃塵有底忙。

又

放翁老去未忘情。鏡裏森然白髮生。一片常愁見花落。三聲最怕聽猿鳴。年年雙隻路傍堠。夜夜短長城上更。晚悟一條差似可。孤舟漁火看潮平。

野性

野性從來與世疎。俗塵自不到吾廬。醉中往往得新句。夢裏時時見異書。稚子那偷服藥酒。家僮尙護放生魚。今朝更有欣然處。引得清泉灌晚蔬。

閑行

出戶莽悠悠。東西本不謀。阻溪因小涉。逢店得中休。鳥沒千山暝。蟬吟一院秋。詩成還自笑。信筆媿冥搜。伏中熱不可過。中夜起坐作詩寄五郎。

衆星若銀礫。老桂臥海底。中夜熱不解。病叟推枕起。悲蟲號草根。孤螢照野水。樹頭風急生。喘汗真一洗。

追憶總角初學古頗自喜。祝身願耆老。常恐抱志死。豈知才術疎。空自凋髮齒。功名永無期。祿不飽妻子。歸耕力又憊。得粟半糠粃。詩書不可賴。如倚折足几。大兒逾六十。逐食走千里。路途況艱梗。累月書一紙。豈不念歸省。屢請輒見柅。幸吾未極衰。汝行姑少止。

暑中自遣

名山處處得幽尋。破硯時時出苦吟。上藥和平無近效。古詩簡淡有遺音。蘇門隱去聞孤嘯。栗里歸來弄素琴。尙恐俗塵除未盡。每思雪夜宿東林。

夜坐中庭

蕭散坐中庭。三更月未生。溯風涼醉頰。汲井濯塵纓。草露沾衣冷。天河隔樹明。裴回不能睡。鼓角下高城。

夜坐門外示子邁

秋意遽如許。體中殊未佳。灘深無宿鷺。草茂有鳴蛙。棲遯從吾好。吟哦與汝偕。雲門漸可到。剩判幾青鞋。

夜坐小飲

零落槐花已滿溝。江湖又見一番秋。冰輪有轍凌空上。銀漢無聲接地流。丹荔甘寒勞遠致。玉醅醇冽喜新篘。移牀坐對西南電。好雨心知不待求。

閑思

畢世爲農不復疑。還東六見歲陰移。閉門旋了和詩債。賣藥不償沽酒資。意倦投牀效龜息。齒疎嚼飯類牛呬。兀然過日君無怪。一念功名恐過悲。

書村店壁

裹茶來就店家煎。手解驢鞍古柳邊。寺閣重重出山嶺。漁舟兩兩破溪煙。近秋漸動尋幽興。絕俸難營覓醉錢。到處不妨閑著句。他年好事或能傳。

幽居

毒暑流金石。吾廬乃爾幽。松棚香帶露。竹簟冷生秋。盪漿蘋花浦。垂竿杜若洲。非關遺世事。聊以解吾愁。

立秋前九日大雨涼甚

天暑正三伏。雨來俄九秋。寒聲入簷戶。爽氣襲巾構。山色凝深黛。溪流戰怒虬。身輕更何苦。處處可閑遊。

又

雨暗初疑暮。雲開已變秋。有風生枕簟。無汗漬衣構。漉酒嘗浮螳。題詩走黑虬。呼兒治書笈。吾欲剡中遊。

寄太湖隱者

青松伐作薪。白玉碎作塵。雖云質已毀。見者猶悲辛。磊砢任棟梁。溫潤中琮璧。豈以捐空山。遂比凡木石。酈生吏高陽。馬周客新豐。從來豪傑士。大指亦略同。具區古大澤。煙水渺千里。可望不可到。中有隱君子。圖書兼河雒。成毀窮乾坤。有時跨蛟鯨。指撝雷雨奔。嗟我獨何人。乃許望顏色。逝將從之遊。變化那得測。

讀史

又
細帙牙籤滿架書。流泉泱泱竹疎疎。人生得志寧無命。一室何妨且埽除。

王侯到底是虛名。何物能爲我重輕。徒步出關胡不可。向來常笑棄繻生。

又

男子胸中正要奇。立談能立大平基。君王玉鉞無窮恨。千載茫茫誰復知。

又

自古功名亦偶諧。胸中要使浩無涯。可憐赫赫丹陽尹。數顆檳榔尙繫懷。

病戒

憂身如憂國。畏病如畏亂。此身雖幸健。敢作無事看。禍福在呼吸。恐懼兼寢飯。人所忽不省。我思嘗熟爛。夜臥不安席。晨起寧待旦。雖云親藥石。得失每參半。人情喜一快。往往觸剋悍。收功寧使遲。覆敗不可玩。

夏夜納涼

河漢微茫月漸低。風聲正在草堂西。莎根唧唧蟲相弔。木末翻翻鵲未栖。屯甲近聞如積水。聞淮壩近募雄淮軍數萬。守關不假用九泥。孤臣報國嗟無地。只有東臯更飽犁。

銘座

身退仍懷退。心平更欲平。直嫌繩尙曲。重覺鼎猶輕。力學能除翳。深居可息鯨。聖門初豈遠。妙處在躬行。

獨坐絕句二首

蛙鳴乃是怒鵬嘯。固非妖。獨宿空山夜。何妨伴寂寥。輕雷不成雨。闕月卻穿雲。獨倚南齋柱。長吟到夜分。

初秋驟涼

我比嚴光勝一籌。不教俗眼識羊裘。滄波萬頃江湖晚。漁唱一聲天地秋。飲酒何嘗能作病。登樓是處可消憂。名山海內知何限。準擬從今更爛遊。

新涼

家住山陰剡曲傍。一番風雨送新涼。亦知病得清秋健。無奈愁隨獨夜長。日落川原橫慘淡。月明洲渚遠蒼茫。老民無復憂時意。齒豁頭童只自傷。

書幸

才薄無能役窮途。不意全得書娛晚暮。遇樂起沉緜。漂母能分食。偷兒肯恕氈。不知從此去。更度幾流年。

獨遊

地僻少人迹。身閑思獨遊。荒村更阻雨。衰鬢不禁秋。斷續呼牛笛。橫斜放鴨舟。殘年澹無事。隨處送悠悠。

記夢

夢遊異境不可識。翠壁蒼崖立千尺。樓臺縹渺出其上。揮手直登無羽翼。門楣扁榜作八分。奇勁非復人間迹。主人鹿弁紫綺裘。相見歡如有疇昔。探懷示我數紙書。妙句玄言皆造極。我卽鈔之雜行草。主人懽悅如甚惜。夢中亦復知是夢。意恐覺時無處覓。自量強記可不忘。雞唱夢回空歎息。

初秋自述

平生偶有愛山僻。垂老常無沽酒資。破屋頽垣吾已矣。大冠長劍汝爲誰。郵亭歷歷關河遠。鬢髮蕭蕭歲

月移殘暑不禁隨手過。東籬又近菊花時。

秋暑夜起追涼

漱罷寒泉弄月明。浩然風露欲三更。曲闌干畔踟躇久。靜聽空廊絡緯聲。

又

道士磯邊浪蹴天。郎官湖上月侵船。暮年自度無因到。且與沙鷗作後緣。

小築

小築並湖隄。茅茨不厭低。引泉澆藥圃。砢竹樹雞棲。夕靄山常淡。秋蕪路欲迷。平生草玄手。老去學鉏犁。

喜雨

黑雲橫絕天漢津。父老僉言候當雨。未論秋稼縣千里。且喜滂沱洗殘暑。我起呼兒扶再拜。汗垢得涼真一快。桔槔抱甕兩置之。日日齋盂飽菰芥。

又

雨聲蕭蕭集庭樹。雨氣森森入窗戶。玉川茆屋久不葺。破漏無復施牀處。我於萬事本悠悠。危坐讀書忘百憂。明朝秋水增三尺。且復沙邊弄釣舟。

秋夜

大枕空牀夢不成。草堂悄悄四無聲。月明漸見天窗白。風起忽聞簷珮鳴。客子未忘悲故里。老人無念到浮名。江村歲歲先涼冷。且復尋盟向短檠。

白鷗

平生崖異每自笑。一接俗人三祓除。惟有白鷗真我客。爾來底事向人疎。

靜室

靜室牀橫一素琴。爾來殊覺道根深。喚回倦枕功名夢。洗盡浮生幻妄心。兩屨雲煙遊少室。一窗風雪宿東林。細思卻是關身事。無奈殘年老病侵。

秋興

秋眠怯簾冷。晨飯喜蔬香。寧使衣百結。肯儲錢一囊。杜門雖局促。負氣尙軒昂。死去真無憾。曾孫似我長。

欲雨

徙穴中庭蟻爭巢。後園鳩物情猶慮患。人事得忘憂。

又

荷鍤決新渠。芟茅補舊廬。共知秋必雨。有備卽安居。

雜感十首以野曠沙岸淨天高秋月明爲韻

呂釣渭水濱。說築傅巖野。雖曰古盛時。得士蓋亦寡。天將啓治亂。人才有用舍。向非萬牛力。孰與成大廈。

又

洙泗日已遠。儒術日已喪。學者稱孔墨。爲國雜伯王。書生幸有聞。力薄不能倡。默默世俗間。汝職無乃曠。

又

我昔下三峽，百丈堆兩車。初發公安城，已過長風沙。早知世路惡，恨不常浮家。至今清夜夢，雙觴聞謳啞。

又

斗杓運四序，寒暑忽已換。人生知幾何，去日難把玩。憑高望煙海，青山忽中斷。秋風肺病蘇，爲子巾一岸。

又

磨鏡要使明，拭几要使淨。奈何視吾心，不若几與鏡。垢汙倘未除，秋毫卽爲病。吾曹亦聖徒，可卽學顏孟。

又

天人本一理，禍福常昭然。人衆何足恃，妄謂能勝天。適燕當北轅，調瑟當解絃。五行未可忽，洪範禹所傳。

又

鏡湖一河清，稽山一河高。浙江百里遠，夜枕聞驚濤。子胥死吳下，千載無人豪。遺魂招不來，我欲續楚騷。

又

歸耕無機襖，出戰無兜鍪。已失西疇春，空懷北平秋。提攜一束書，蹭蹬至白頭。鬴中有轆飯，一飽吾何求。
吳人謂飯不炊者爲轆飯，轆音勞。

又

我昔遊劍南，爛醉平羌月。一盃玻璃春，萬里望吳越。豈知有天幸，故山得歸骨。扁舟小江上，夜半看月沒。

又

入東多名山，天台連四明。路窮寺門出，林闕溪橋橫。豈無一月間，結束與子行。會揀最幽處，煨芋聽雪聲。

秋思

秋雲易簇日常陰。西望山村每欲尋。屏掩數峰臨峭絕。蛇蟠一徑入幽深。

又

山步溪橋入早秋。飄然無處不堪遊。僧廊偶爲題詩入。魚市常因施藥留。

又

臨海銅燈喜夜長。新春笛簟怨秋涼。世間生滅無窮境。盡付山房一炷香。

台州白銅燈繫絕妙。

又

才不才間未必全。胸中元自要超然。黃金不博身強健。且醉江湖萬里天。

又

牙齒漂浮欲半空。此生已付有無中。一盃藜粥楓林下。時與鄰翁說歲豐。

又

疏泉洗石誇身健。試墨燒香破日長。若得三山安樂法。不須更覓玉函方。

又

傍縣人來涕泗翻。蝗災曝虎不堪言。天心似爲衰翁地。飽食安眠獨北村。

又

閑愁正可資詩酒。小疾安能減食眠。一畝旋租畦菜地。千錢新買釣魚船。

又

眼明尙見蠅頭字。暑退初親雁足燈。歷歷胸中千載事。莫將輕比住菴僧。

又

虛極靜篤道乃見。仁至義盡餘何憂。名山采藥恐未免。策蹇孰能從我遊。

雞犬

鄉村年久競農務。秋斂春耕恐失時。我老元無夙興事。嬾雞啼曉恰相宜。

又

貧家也復謹朝昏。小犬今年乞近村。糠粃無多深媿汝。狺狺終夜護籬門。

秋來瘦甚而益健戲作

莫笑形羸不自支。清虛正與老人宜。矛頭浙米誰能食。甑裏生塵卻自奇。獨釣又逢秋晚後。安眠常到日高時。邇來久雨牆垣壞。砢竹東岡自作籬。

秋夜

岸幘蕭然病體輕。雨餘郊館已涼生。微風掠面酒無力。明月滿窗眠不成。葉底涓涓秋露滴。草根咽咽暗蛩鳴。屏居未免傷孤寂。賴有鄰翁約耦耕。

秋興

巢燕無情不更回。門庭日日落楸槐。新涼漸喜償碑債。多病還憂欠藥材。社近家方藟濁酒。客來身自埽

蒼苔道心已熟機心盡。寄語鷓鴣莫苦猜。

閑詠

莫笑結廬魚稻鄉。風流殊未減華堂。茶分正焙新開箬。水挹中澗自候湯。小兒研朱晨點易。重簾埽地晝焚香。個中富貴君知否。不必金貂侍紫皇。青城丈人祠。畫仙官。有服貂蟬者。

人壽至耄期

人壽至耄期。如位至王公。非以德將之。往往不克終。非必皆大惡。過取固多凶。吾今垂九十。追逐羣衆中。筋骸勝拜起。耳目未盲聾。強健天所借。正與富貴同。一念媿屋漏。一言誑孩童。老無朋友規。日夜勤自攻。

訪野人

我行城西南。適茲素秋時。風露雖已高。草木鬱未衰。敲門尋野人。一笑萬事非。拂榻意何勤。酒醺雁鶩肥。新涼天所賜。盡醉不足辭。擊壤歌堯年。瞑目以爲期。

熏蟲效宛陵先生體

澤國故多蟲。乘夜吁可怪。舉扇不能卻。燔艾取一快。不如小忍之。驅逐吾已隘。寧聞大度士。變色爲蜂蟻。

吹笛

吳江楚澤閑遊徧。未豁平生萬里心。醉裏獨攜蒼玉筍。岳陽樓上作龍吟。

書幸

破屋頽垣鬼笑窮。暗中調護賴天公。頻年得疾身猶健。百種無營飯不空。

感事

已醉猩猩猶愛屐。入秋燕燕尙爭巢。老夫看盡人間事。欲向山僧學打包。

晚晴

雨如塵點送新涼。雲作魚鱗襯夕陽。蓬戶清閑貧亦好。筇輿安穩病何傷。

農家

寂寂江村數掩籬。吾廬又及素秋時。橫林未脫色已盡。孤鳥欲棲鳴更悲。小釜蓴羹初下飯。矮瓶豆粉正燃萁。爲農幸有家風在。百世相傳更勿疑。

寓歎

白首還鄉厭蕨薇。佹佹自歎欲疇依。門庭不埽稀迎客。碁枰無聲未贖衣。達士共知生是贅。古人嘗謂死爲歸。耕疇幸可期中熟。又報殘蝗接翅飛。

又

憶昔建炎南渡時。兵間脫死命如絲。奉親百口一身在。許國寸心孤劍知。坐有客瘖堪共醉。身今病忘莫求醫。出門但畏從人事。臨水登山卻未衰。

雨夜

病多漸減燈前課。老甚都忘枕上愁。一段高情誰會得。臥聽簷雨瀉清秋。

秋懷

火食非初志。衣塵每自哀。危途觸滌瀕。歸興薄蓬萊。逋客傳琴調。高僧乞藥栽。人間豈不好。病眼自慵開。

又

苦雨無時止。幽人空復情。少眠知夜永。入病喜秋清。螢傍疎簾度。蛩依壞甃鳴。流年那可挽。又見曉窗明。

又

獨立離人境。幽居察物情。蟻知軍陣法。蟲作緯車聲。身老唯貪睡。兒癡亦惰耕。騰騰復兀兀。何以報時平。

又

寓世久成贅。忘家生若浮。安能三太息。惟有四宜休。屋壞無全堵。船輕每信流。鴟夷幸無恙。賴爾可消憂。

小室

窗几窮幽致。圖書發古香。古香見米元章書畫史。尺池魚鱗鱗。拳石樹蒼蒼。老去身猶健。秋來日自長。養生吾豈解。嬾或似稽康。

贈道侶

蕊笈人多有。惟君獨造微。丹成河自塞。吟罷劍俱飛。酒市尋差易。雲山覓更非。何時醉攜手。爲我發玄機。

舟中醉題

風吹蘆荻聲颼颼。晚潮入港浮孤舟。老民已埽市朝迹。造物全付江湖秋。項里廟前是魚市。禹會橋邊多酒樓。醉來且復過此日。莫爲碁枰悲無裘。

又

鮑郎山前煙雨昏。疎燈小市愁偏門。上船初發十字港。鼓棹忽過三家村。孤鸞對鏡空自感。老龜搗牀何足論。但願諸公各戮力。上助明主憂元元。偏門十字港。三家村。皆地名。

出遊暮歸

東行西行日暮歸。川雲漠漠雨霏霏。蝗餘場上禾收薄。酒貴街頭客醉稀。買犢躬耕空自力。灼龜占歲又成非。稚孫索飯殊關抱。憐汝何時得瓠肥。

園中作

紗巾一幅立斜陽。本尙無閑況有忙。雞犬往來空自得。禽魚翔泳各相忘。欲衰莎草無多綠。未落梧桐已半黃。徂歲匆匆成絕嘆。瓦溝行復見新霜。

卷第七十八

感舊

莫笑山翁老欲僵。壯年曾及事高皇。雕戈北出戍窮塞。華表東歸悲故鄉。萬事固難輕忖度。百年猶有未更嘗。紛紛謗譽何勞問。但覺邯鄲一夢長。齊民要術曰。智如禹湯不如更嘗。

東園

車馬無聲客到稀。荷鋤終日在園扉。斷殘地脈疏泉過。穿透天心得句歸。對鏡每悲鸞獨舞。繞枝誰見鵲南飛。悠然自遣君無怪。文史如山暫解圍。

秋夜

局促人間每鮮歡。秋來病骨愈酸寒。夾衣尙典雁聲過。斷簡未收雞唱殘。退士鬢毛紛似雪。老臣心事炳如丹。燈前握臂無交舊。聊喚清尊少自寬。

驛壁偶題

疊疊驛門堦。杳杳寺樓鐘。葉落樹陰薄。雲生山崦重。交親窮未棄。父子老相從。惟待新粳熟。高眠聽夜舂。

又

去去投山驛。悠悠解橐裝。斜陽穿破廐。落葉滿空廊。舞簡村巫醉。塗朱野女粧。近行吾亦倦。假寢據胡牀。

又

過市未十里。入山知幾重。幽林聞格磔。淺瀨見唼喁。小瓮家家酒。衡門世世農。班生定癡絕。辛苦覓侯封。

夜起思子虞

我久依耕壠。兒方弔戰場。臥聞風浩蕩。起視月蒼茫。老境裨袍暖。貧家菜粥香。惟愁殺風景。無酒作重陽。

秋日次前輩新年韻

孤生雖永棄。要亦是黎元。渺渺煙中路。冥冥海上村。小灘看鷺立。平野送鴉翻。卽欲掩關臥。南山猶未昏。

又

舊交多雋傑。離散各何之。騏驥志千里。鷓鴣巢一枝。青雲迷故步。白首負明時。幸有殘書卷。猶堪付小兒。

又

老人常獨處。一笑比河清。終日無來客。三年不入城。高眠聽酒滴。危坐對雲生。矯首羲皇世。吾其享大羹。

又
浮家久居蜀。下峽晚還東。天際孤帆遠。花前百榼空。旅遊渾似夢。年運遂成翁。欲話義眉月。無人可與同。

又
殘年垂九十。雪鬢不勝繁。賣屨糴炊米。典衣租廢園。山深雲滿屋。夜靜月當門。鄰曲時相過。扶行賴稚孫。

仲秋書事

秋風社散日平西。餘昨殘壺手自提。賜食敢思烹細項。家庖仍禁擘團臍。昔爲僞曹耶兼領膳部。每蒙賜食。與王公略等。食品中有羊細項。甚珍。予近以惡殺。不食蟹。

又
天心那得與人同。牲社家家禱歲豐。料理蝗餘猶十五。殘年亦未委溝中。

又
斷雲歸岫雨初收。茅舍蕭條古渡頭。短褐老人垂九十。松枯石瘦不禁秋。

又
客來深媿里閭情。近爲衰殘罷送迎。旋置風爐煎顧渚。劇談猶得慰平生。

又
舉家食粥顏平原。坐客無氈鄭廣文。不是有心輕富貴。偶然看破是浮雲。

又

書生習氣盡驅除。酒興詩情亦已無。底怪今朝親筆硯。村鄉來請辟蝗符。

又

靈府不搖神泰定。病根已去脈和平。金丹妙處無多子。只要先生兩眼明。

又

省身要似晨通髮。止殺先從暮拍蚊。老負明時無補報。惟將忠敬事心君。

又

杖得輕堅餘可略。酒能醇勁更何求。二君最是平生舊。白首相從萬事休。

又

心明始信元無佛。氣住何曾別有仙。領取三山安樂法。蒲團紙帳過年年。

步屨

名山有志未能酬。步屨東岡當出遊。小閣捲簾鷺鷥起。清池投餌看魚浮。西風吹葉空多感。落日銜山尙小留。兒老戍邊歸未得。淮南新雁又經秋。

後死

後死非初望。餘生只自悲。舊交孤劍在。壯志短檠知。行步雖依杖。光陰未付棋。爲農自當力。不爲學齋詩。

思刻

羸疾無休日。清秋適此時。節存旄盡落。帶膳眼頻移。吾興復不淺。俗人那得知。會當遊剡去。支許有深期。
故里

漏盡鐘鳴有夜行。幾人故里得歸耕。摧傷自喜消前業。疾恙天教學養生。鄰曲新傳秧馬式。房櫓靜聽緯車聲。芋魁菰首君無笑。老子看來是大烹。

野意

久忝明恩返故鄉。全家衣食出耕桑。詩纔適意寧求好。醉卽成眠不暇狂。小雨荷鋤分藥品。乍涼扶杖看優場。此身已作農夫死。卻媿時賢獨未忘。

意行至神祠酒坊而歸

雨收霽色滿川原。獨曳枯藤出里門。陌上微風搖稗穗。溝中殘水出籬根。繫牲廟柱悲刀几。醺酒村場滿盎盆。興盡還家殊不遠。漁燈續火鬧黃昏。

訪村老

強健如翁舉世稀。夜深容我叩門扉。大兒叱犢戴星出。稚子捕魚乘月歸。骨肉團圓樂無遠別。比鄰假貸不相違。人間可羨惟農畝。又見秋燈照搗衣。

戲題僧巷

致虛守靜氣當全。家付兒孫命委天。夢事只堪高臥看。危途誰校疾行先。獨轅短棹聊乘興。野草幽花自鬪妍。數字漫留僧壁去。與身閑作後身緣。

書意

秋江菰菜喜新嘗。鹽酪親調七箸香。但有長腰吳下米。豈須細肋大官羊。青衫昔悔塵中老。白髮今宜靜處藏。一事尙須深自咎。街頭兒女識韓康。

又

物我年來已兩忘。蕭然湖曲一茆堂。身閑自與俗子遠。睡美不知秋夜長。餘祿正應齏菹在。宿醒時臥酒壚傍。老人肘後長生藥。檢盡千金無此方。

南塘晚步記鄰里語

喚舟欲泛湖。出門日已暮。顧景遂輟行。老病畏風露。不如上南塘。蕭然散予步。季子挾書卷。仲孫奉杖屨。夏秋多杜門。一出驚行路。鄰里相與言。稿事凜可懼。羣蝗飛蔽日。殘齧到竹樹。惟茲數里間。若有神物護。天菑幸獨薄。豈以此老故。老人亦自笑。病骨日欲仆。鬼神彼何爲。與世殊好惡。相期勤自修。此幸豈可屢。

稽山道中

文章事業初何有。鐘鼎山林本自同。昨暮釣魚天鏡北。今朝采藥石帆東。

又

禹陵草木初霑露。謝墅人家已閉門。八十年間幾來往。癡頑不料至今存。

讀近人詩

琢磨自是文章病。奇險尤傷氣骨多。君看大羹玄酒味。蟹螯蛤柱豈同科。

琴劍

流塵冉冉琴誰鼓。漬血斑斑劍不磨。俱是人間感懷事。豈無壯士爲悲歌。

戲題

莫輕凡骨未飛騰。要勝人間粥飯僧。山路近行猶百里。酒盃一舉必三升。

溪上小雨

我是人間自在人。江湖處處可垂綸。掃空紫陌紅塵夢。收得煙蓑雨笠身。

晚聞庭樹鴉鳴有感

烏鵲棲我庭。將旦輒散去。此豈厭所棲。亦以飲啄故。一飢能驅人。擾擾無晨暮。不然亦已矣。豈樂塵土汙。我有茆三間。自少鮮外慕。力耕自足食。雞豚亦可具。晚雖誤收召。疾走如脫兔。六年楓林下。不知歲月度。殘骸幸強健。沽酒徧山步。鄉語謂湖山間。小聚爲山步。醉歸每自笑。不負此芒屨。平生愛方外。雖老冀有遇。秋風送片帆。更上剡溪路。

秋夜齋中

木落煙深江上村。暮秋蕭瑟不堪論。雁如著意頻驚枕。月似知愁故入門。營道數峯新石友。近得道石數峯。廣陵一曲古桐孫。亦知長物終安取。聊與兒曹洗睡昏。

又

殘年冉冉返丘園。敗屋蕭蕭長子孫。久悔文辭妨大學。偶因憂患得玄門。扶持後死知天幸。容養無能荷

國恩急雨打窗秋又晚。旋挑野菜助盤殮。

識魏路逢野老共語歸舍賦此詩

幾年羸疾臥家山。牧豎樵夫日往還。至論本求編簡上。忠言乃在里閭間。私憂騷屑心常折。念報明時涕每潸。二句實書其語。寸祿不沾能及此。細聽只益厚吾顏。

秋雨

暮秋木葉已微丹。小雨蕭蕭又作寒。目送斷雲歸谷口。身隨新雁寄江干。濁醪易負尋常債。退士難叨本分官。謝盡浮名更無事。燈前兒女話團圓。

秋來益覺頑健時一出遊意中甚適雜賦五字

旬日雨頻作。一年秋又殘。光陰不少貸。懷抱若爲寬。小瓮聊尋醉。疎砧已戒寒。定知清夜夢。又過石闌干。
剡溪道中佳處

又

何許是吾廬。南臨古鏡湖。園林垂橘柚。門巷落楸梧。牀穩龜無息。巢新鶴有雛。鄰翁殊耐久。有酒卽相呼。

又

原野無閑土。鄉閭有老人。疾平行已健。秋晚醉差頻。啄黍黃雞嫩。迎霜紫蟹新。百年元任運。一笑卻關身。

又

餐食筋骸憶。林廬歲月侵。道窮思故友。力盡悔初心。浩浩天知我。悠悠後視今。飄零君勿歎。古瑟有遺音。

又

輕裝兩衣笈。假寢一胡牀。喚渡江樓下。逢僧縣驛傍。橫林生夕靄。孤蝶弄秋光。老慣人間事。無詩寄斷腸。

又

渡水得魚舍。乞漿敲竹扉。地偏花帶恨。林暖鳥忘歸。獨往非違世。幽居自息機。晚來清興極。更喜雨霏霏。

又

窮阨非由命。從來作計疎。妄營資鬼笑。多愛奪狐書。何事能陶寫。惟當盡破除。霜晴宜著屐。不敢笑無驢。

又

寓世年雖往。安心疾已平。每思丹竈冷。宜覺世緣輕。布被雞催曉。蓬窗鵲噪晴。呼兒淨洗硯。書帖寄青城。

又

萬古無窮夢。餘年欲散雲。身雖迫衰謝。學未廢鉏耰。開卷多新得。逢人有舊聞。伏生雖九十。猶冀與斯文。

又

斯世本無事。古人誰與歸。屏除閑塵尾。收拾舊蓑衣。浩浩觀空劫。拳拳訟昨非。雲開天萬里。遼鶴正孤飛。

遊近山僧菴

臥看香穗歎吾衰。起著芒屨信所之。十里溪山最佳處。一年寒煖適中時。眼明竹院如曾到。心許沙鷗卜後期。不是詩人託高興。日長眞付一枰碁。

喜晴

三日雨不止。意謂無復晴。泥深不可出。臥聽空塔聲。事有未易料。南風起三更。陣陣浮雲歸。杲杲初日明。稿事既竭作。機杼比屋鳴。天公真老手。談笑功皆成。家家有新釀。歡言相送迎。蝗孽幸掃空。努力謀春耕。

阿通自閩中歸。甫九歲。頗有老成之風。作此詩示之。

農家

大布縫袍穩。乾薪起火紅。薄才施吠畝。朴學教兒童。羊要高爲棧。雞當細織籠。農家自堪樂。不是傲王公。

又

盜息無排甲。兵消不取丁。頻過鬪雞舍。閑學相牛經。江浦漁歌遠。人家績火青。遨遊無定處。隨意宿丘亭。

又

東舍女乘龍。西家婦夢熊。翁誇酒重碧。孫愛果初紅。栗烈三冬近。團圓一笑同。營生無繆巧。百事仰天公。

又

租犢耕蕎地。呼船取荻薪。蒼頭供井臼。赤脚解縫紉。僧乞銘師塔。巫邀賽土神。心常厭多事。謝病又經旬。

又

新作地爐成。蓬窗亦自明。油香麴餌脆。人靜布機鳴。縣吏催科簡。豪家督債輕。小康何敢望。生計且支撐。

又

諸孫晚下學。髻脫繞園行。互笑藏鉤拙。爭言鬪草贏。爺嚴責程課。翁愛哺飴飴。富貴寧期汝。它年且力耕。

讀老子有感

左史倚相讀皇墳。學者尙得窺全渾。孰爲武成二三策。寧取道德五千言。巢居結繩事益遠。澆淳散朴忍復論。安得深山老不死。坐待古俗還義軒。

鄰人送菰菜

張蒼飲乳元難學。綺季餐芝未免飢。稻飯似珠菰似玉。老農此味有誰知。

書喜

莫謂家貧厭舊醅。一尊聊對桂花開。天菑已過無蝗孽。海舶初通有藥材。剩借涼風吹醉頰。况逢急雨洗浮埃。入秋腰脚增強健。山麓從今日日來。

秋日徙倚門外久之

舍前煙水似瀟湘。白首歸來愛故鄉。五畝山園鬱桑柘。數椽茅屋映菰蔣。翻翻小繖船歸郭。渺渺長歌月滿塘。却掩柴荆了無事。篆盤重點已殘香。

雙蝶

庭草何離離。清晨露猶溼。草頭兩黃蝶。爲我小佇立。秋光亦已晚。行見霜霰集。方春不盡狂。汝悔尙何及。吾生更堪笑。去日如電急。功名竟何在。惆悵劍峯澗。

法雲孚上座求詩

老人癡鈍避嫌猜。終日柴門閉不開。堪笑山僧能好事。乞碑纔去覓詩來。近有淨慈僧訥來求銘其師塔。

亦寓法雲幾年。

詹仲信出示卜居詩佳甚作二絕句謝之

十里相望亦未遙。何由頻得慰無聊。老來萬事慵開眼。獨喜詩盟不寂寥。

又

年來阻闊動經時。忽見新篇乃爾奇。安得齊紈翦團扇。爲君小草卜居詩。

夜雨

夜雨有殘滴。秋砧無絕聲。得詩旋已忘。覺睡固難成。壯志悲垂老。歸耕願太平。發春纔屬爾。歲事又崢嶸。

晚秋出門戲詠

病叟徜徉古澤邊。橫林搖落暮秋天。鳴鳩雨後卻呼婦。飛雀霜前先著縣。抱被每投僧榻宿。卷書時當酒家錢。秋風想像芝房熟。北望商山一悵然。

又

閑愁那到野人邊。萬事元知合付天。盡醉僅能三龠酒。新寒未辦一銖錢。鄰僧每欲分齋鉢。廟史猶來索社錢。無地置錫眞細事。不妨胸次日超然。

消搖

莫笑茆檐陋。消搖遂野情。遇魔增道力。因病悟浮生。謀食憑長鑱。論交得短檠。不知從此去。幾見雁南征。

堅頑

小市朝行藥。明燈夜讀書。雖殊帶箭鶴。要是脫鉤魚。有飯已多矣。無衣亦晏如。堅頑君勿怪。豈失遂吾初。
遺懷

息倦登耕隴。乘閑弄釣舟。安能書咄咄。且復送悠悠。窮巷誰來往。村醪自獻酬。何妨晏平仲。歲晚一狐裘。
又

窮每占周易。閑惟讀楚騷。病隨災漸退。嬾與拙相遭。投枕燈初上。披衣日已高。清愁亦可剪。無處買并刀。
又

有志師千載。無方起九原。山園菜常瘦。村店酒多渾。衰疾形詩句。窮愁入夢魂。傍觀任嘲笑。吾道始應尊。
又

雲族初疑雨。風生忽快晴。半窗松竹影。繞舍鳥烏聲。看劍心猶壯。開書眼漸明。餘年真已矣。不復問君平。
初寒

日月誰能駐。風霜忽已高。公孫分布被。范叔共綈袍。糲糲炊香飯。蒲萄壓小槽。所慚才已盡。孤詠不能豪。
閑行至西山民家

秋林半丹葉。秋草多碧花。隔山五六里。臨水兩三家。晉魚與伐荻。各自有生涯。平池散雁鷺。繞舍栽桑麻。
客至但舉手。土釜煎秋茶。城中不如汝。切莫慕浮夸。

夜與子遙說蜀道因作長句示之

憶自梁州入劍門。關山無處不消魂。亞松託宿逢秋雨。小柏經行聽曉猿。亞松在成都。小柏在三泉閣道。

當日只知悲客路。歸來終亦老江村。吾兒生晚那知此。聊對青燈與細論。
村舍

無懷葛天古遺民。種畬歸來束澗薪。亭長聞名不識面。豈知明府是何人。

又

雞鳴犬吠相聞地。穴處巢居上古風。飽飯不爲明日慮。酣歌便過百年中。

又

露草乾時兒牧羊。朝日出時女采桑。一牀絮被千萬足。不解城中有許忙。

又

山高正對燒畬火。溪近時聞戽水聲。破屋已斜猶可住。老牛雖瘠尙能耕。

又

莫笑山家拙治生。正緣亦足得身輕。滿爐薪火渾家暖。一盃松肪徹夜明。

又

故絮五更偏覺冷。薄糜未午已先飢。誰知人不堪憂處。正是降魔奏凱時。

又

氣全自可忘憂患。心動安能敵死生。若論老人眞受用。已多稗飯與藜羹。

登山西望有懷季長

行年垂九十。舉世少輩行。敢言貧非病。要是老益壯。平時嬾書疏。有答未始倡。張卿獨所敬。夙昔推直諒。迹雖隔吳蜀。相憶每慘愴。使者交道中。萬里問亡恙。忽焉奉赴告。斯文豈將喪。腰經不撫棺。執紼不會葬。送子珉山下。想見車百兩。我徒哭寢門。淚盡氣寒吭。年雖不耄期。仕誰不將相。神明司禍福。于職豈亦曠。霜風九月初。憑高極西望。江原在何許。安得鏐疊嶂。

山行

五尺桄榔杖。二寸栴檀冠。往來山谷中。髮白面渥丹。初非乳石力。所得懷抱寬。入寺不尋僧。自愛松風寒。松風晚少靜。我意殊未闌。却尋歸村路。白石明青灘。

二樂

遊山恨不遠。讀書恨不博。天下多名山。何處無芒屨。束書飽蠹魚。於汝寧不怍。日月如過燒。老病將何若。眼猶給開卷。足尙供尋壑。少勞君勿辭。是中有真樂。

村女

白襦女兒繫青裙。東家西家世通婚。采桑餉飯無百步。至老何曾識別村。

示子邁

我初學詩日。但欲工藻繪。中年始少悟。漸若窺宏大。怪奇亦間出。如石漱湍瀨。數仞李杜牆。常恨欠領會。元白纔倚門。溫李真自郤。正令筆扛鼎。亦未造三昧。詩爲六藝一。豈用資狡獪。晉人謂戲爲狡獪。今閩語尙爾。汝果欲學詩。工夫在詩外。

聞新雁有感

才本無多老更疎。功名已負此心初。鏡湖夜半聞新雁。自起吹燈讀漢書。

又

新雁南來片影孤。冷雲深處宿菰蘆。不知湘水巴陵路。曾記漁陽上谷無。

山村獨酌

腰劍如今不換牛。固應萬事一時休。孤舟慣作瀟湘夢。駿馬寧思鄠杜遊。毀譽要須千載定。功名已向隔生求。石帆山下秋風晚。買酒看雲自獻酬。

小園獨酌

橫林搖落弄微丹。深院蕭條作小寒。秋氣已高殊可喜。老懷多感自無歡。鹿初離母斑猶淺。橘乍經霜味尙酸。小酌一卮幽興足。豈須落佩與頽冠。

卷第七十九

秋思

又

湖邊一夜霜。庭樹無秋聲。嬾不近筆硯。何以紓幽情。但有一睡耳。展轉無由成。起擁地爐暖。坐待天牕明。弊衣但故絮。糲食惟黃蠶。餘年如登山。步步勤攀躋。從子念寂寞。千里致鹿麀。秋風石帆下。伴我扶青藜。

又

稽山九十翁。病起無氣力。擁杖牧雞豚。乃是老人職。一盃芋糲羹。孫子喚翁食。既飽負朝陽。自愧爾何德。

又

今日鵲噪簷。邢趙蜀父去華。別我西。老懷易感慨。近別亦慘悽。自我臥孤村。海內無輪蹄。垂虹秋愈佳。不得同裝齋。

覽鏡

鏡中老翁誰。非復少年我。誦書如布穀。拈出無一可。又非富貴逼。棄去自不果。無功博一飽。有鼻當萬坐。老境最堪笑。作計日益左。正似鳩拙巢。不及蠶自裹。霜寒衣未贖。瑟縮附殘火。作詩數十年。所得良瓊瑣。弱松困蔓纏。何日見磊砢。洞庭可遠遊。秋風思楓柁。

雨晴

小雨初增氣慘悽。新晴差解病沉迷。虛廊靜院聽松籟。細草甘泉養鹿麕。寒鶻細分山遠近。野歌相應路高低。孰知倦客蕭然意。水晶茶經手自攜。

秋盡自遣

息駕江湖上。推移歲又殘。雨添苔暈紫。霜染柏林丹。貧歎耕疇薄。狂依禁網寬。遊山攜一鉢。到寺卽開單。

又

老健非頤攝。羈窮爲折除。人情看已慣。身在不論餘。席下錢雖盡。餅中粟有儲。行歌混樵牧。吾計未全疎。

畫臥

我意殊昏然。一日三就枕。目前幸未病。病勢亦凜凜。偶拈一卷讀。美若鳩食菰。雖云嗜好篤。自計亦已審。聖門未能窺。詎敢希在寢。所求養根原。常恐躐堦品。死期誠已迫。尙可支數稔。蕭瑟不廢功。吾其享高廩。

獨坐

博山香霧散。緋緋袖手何妨靜。掩扉六十年前故人盡。紹興中往還朋舊。今乃無一人在。八千里外寄書稀。自張季長下世。蜀中書問幾絕。昨朝送客桐江去。今日逢僧剡縣歸。欲作小詩還復嬾。海鷗與我兩忘機。

書感

衰顏非復昔年朱。幾過黃公舊酒壚。成敗只堪三太息。是非終付一胡盧。連天煙草迷歸夢。動地風波歷畏途。辛苦一生成底事。躬耕猶得補東隅。

舟中夜賦

問天乞得不貲身。常作東阡北陌人。買酒不澆胸礪硯。憂時空覺膽輪囷。寓居尙復能栽竹。羈宦懸知正憶蓴。那似石帆山下客。釣船載月泊煙津。

舍傍晚步

蒲團初起定。藤杖偶閑行。鳥語如相命。魚浮忽自驚。麥苗經雨綠。楓葉得霜頰。野老淳風在。悠然不送迎。

又

養疾便居僻。尋幽喜雨晴。偶因將鹿出。遂作放魚行。木落塔初見。潦收灘自生。霜清念遊衍。漸擬問山程。

自詠

紛紛世態但堪悲。一念蕭然我亦奇。醉裏猖狂醒自笑。夢中虛幻覺方知。江湖重複風波惡。齒髮凋零歲月馳。安得中原路如砥。渭川釣伴待多時。

又

茅舍蕭條似寶坊。老人終日對爐香。學荒自笑身空在。祿盡誰知壽更長。陂水蘸隄常灑灑。麥苗覆塊已蒼蒼。經行更有欣然處。四野鉏耰滿夕陽。

初冬

初冬常憶宴梁州。百炬如椽滿畫樓。三十七年猶未死。茅簷霜冷一燈幽。

霜晴

萬瓦新霜白。一窗朝日晴。破裘身亦暖。細字眼猶明。老喜譚諄語。衰常踈蹕行。登封書不草。力穡報時平。

初寒

新雁來時歲又殘。丹楓數樹照江干。前山雲起忽成暝。陋屋雨來初變寒。身退已收清禁夢。里居終出上恩寬。作詩老恨無奇思。時取囊中斷稿看。

題傳神

溼雲生兩屨。細雨暗孤篷。悔不桐江上。從初作釣翁。

書感

伐性戕生豈一端。暮年贏得是衰殘。齒牙零落畏大載。毛髮蕭疎便小冠。惜日每驚新曆換。怯寒尙覺弊廬寬。華山阻絕岷山遠。安得冥鴻借羽翰。

宋都曹屢寄詩且督和答作此示之

古詩三千篇。刪取財十一。每讀先再拜。若聽清廟瑟。詩降爲楚騷。猶足中六律。天未喪斯文。杜老乃獨出。陵遲至元白。固已可憤疾。及觀晚唐作。令人欲焚筆。此風近復熾。隙穴始難窒。淫哇解移人。往往喪妙質。苦言告學者。切勿爲所怵。航川必至海。爲道當擇術。

獨飲

蕭蕭霜風勁。蕭蕭木葉聲。殘年如寄爾。冷坐太憎生。就市沽新釀。呼兒洗破觥。獨樹還獨醉。無月配長庚。簡湖中隱者

初冬雜詠

十里隔天鏡。一菴依翠屏。甘泉勝牛乳。靈藥似人形。處處筇枝健。年年鬢色青。客星猶不作。肯應少微星。重陽已過二十日。殘菊纔存三四枝。對酒插花君勿笑。從來不解入時宜。

又

古壽書來言得堵。東陽人到報生孫。一家三處俱強健。且撥閑愁近酒尊。

又

兒時愛書百事廢。飯冷餓乾呼不來。一生被誤終未醒。老作蠹魚吁可哀。

又

微風聲水靴文浪。薄日烘雲卵色天。但恨世間閑客少。江湖底處欠漁船。

又

書生本欲輩莘渭。蹭蹬乃去爲詩人。囊中略有七千首。不負百年風月身。

又

俗緣已斷寧容續。幽事雖多不厭增。折簡迎醫看病鹿。舂粳炊飯供遊僧。

又

夜窗父子共煎茶。一點青燈冷結花。村落盜清無吠犬。園林月上有啼鴉。

又

老去胸中百事真。同遊無復白頭新。鵲從熟後頻分食。鹿漸馴來不避人。

老歎

齒髮衰殘久退休。衡茅荒寂更禁秋。一無用力身猶倦。百不關心夢亦愁。遠浦臥看鳧泛泛。深林時聽鹿呦呦。天台日有遊僧過。白朮黃精不待求。

小園

誰爲閑愁撥不開。小園也復有池臺。清泉白石皆吾友。綠李黃梅盡手栽。衝雨菱雞時上下。近人栗鼠不

驚猜。自憐兩履猶輕捷。不待兒扶日日來。

冬夜思里中多不濟者愴然有賦

大耋年光病日侵。久辭微祿臥山林。雖無歎老嗟卑語。猶有哀窮悼屈心。力薄不能推一飯。義深常願散千金。夜闌感慨殘燈下。皎皎孤懷帝所臨。

宿近村

病齒漂浮短髮稀。此身猶墮亂書圍。邯鄲倦枕晨炊熟。昌谷空囊晚醉歸。久困厭從人乞貸。力耕頻遇歲凶饑。行年九十窮彌甚。旅舍燈前自綻衣。

梅村野人家小憩

正遣清詩覓菊栽。穿雲涉水又尋梅。萬牛不挽新愁去。一鳥還驚午夢回。老媿逢人說幽憤。窮能隨事學低摧。江邊漂母何爲者。無食王孫未易哀。

寄陳伯予主簿

今年閏餘時令早。十月霜風吹客倒。老夫畏寒不出門。數步鄰家迹如掃。此時陳子獨何勇。飢僮瘦馬長安道。絕知涵養與人別。吐氣如虹失衰老。孟軻浩然正應爾。豈比區區養梨棗。萬鍾于子本何加。一官未免從人討。世誰不達子獨窮。熟念令人惡懷抱。石渠天祿正須才。往乞揚雄太玄草。

夜半憶剡溪

早睡苦夜長。晚睡意復倦。斂膝傍殘燈。拭背展書卷。時時搔短髮。稍稍磨凍硯。更闌月入戶。皎若舒白練。

便思泛樵風。溪名次第入剡縣。名山如高人。豈可久不見。

道上見村民聚飲

霜風利如割。霜葉淨如掃。正當十月時。我行山陰道。場功俱已畢。歡樂無壯老。野歌相和答。村鼓更擊考。市壚酒雖薄。羣飲必醉倒。雞豚治羹葢。魚蟹雜鮮薹。但願時太平。鄰里常相保。家家了租稅。春酒壽翁媼。

小江

出郭四十里。孟冬天尚和。風生帆力健。木落月明多。小市人聲散。長橋炬火過。吾生幾來往。撫枕獨悲歌。

短歌行

富貴得意如登天。自計一跌理不全。晝食忘味夜費眠。渠過一日如一年。春蠶得衣耕得食。農功初成各休息。賣酒壚邊紛鼓笛。我過一年如一日。二者求兼勢安可。與我周旋寧作我。春城桃李豈不妍。雪澗未妨松磊砢。人生禍福難遽論。廟犧烏得爲孤豚。君不見獵徒父子牽黃犬。歲歲秋風下蔡門。

初寒

重雲蔽白日。陂港日夜涸。秋風纔幾時。已見霜雪作。人生各有分。豈必衣狐貉。吳中冬蔬茂。盤筯不寂寞。磚泥治牆屋。伐篠補籬落。薄酒亦醉人。問子胡不樂。

對鏡

鏡中衰顏失敷腴。綠鬢已作霜蓬枯。兩肩聳聳似山字。曳杖更有蠻童扶。自驚何以致此老。亟欲脩敬問起居。徐徐熟視乃大笑。但記昔我忘今吾。今吾雖憊頗神王。飛仙正可折簡呼。遠遊縱未從谿父。醉眼猶

能隘具區。

書劍

書劍當年徧兩川。歸來垂釣鏡湖邊。老皆有死豈獨我。士固多貧寧怨天。物外勝遊攜鶴去。琴中絕譜就僧傳。莫言白首詩才盡。讀罷猶能意爽然。

城南道中有感

行李蕭然一束書。城南觸目更愁予。市門乞食僧持鉢。關路哦詩客跨驢。殘髮無多眞已矣。名山未去獨何歟。芒屨可買身猶健。紅樹青霜十月初。

寄子虞兼示子遜

書生賦命艱。舉步得憂患。敢論得意事。一笑亦有限。南征度閩嶺。西戍歷蜀棧。吳江聽唳鶴。淮浦送歸雁。歸來耕故山。暮雨泥沒胫。羣鴉下空陂。黃犢鳴絕岸。索飯閔兒啼。乞糲虞妾覲。一裘三十年。破裂不受綻。欲添一把茅。百計亦未辦。大兒急親養。辛苦就遠宦。間出冒虜塵。短甲中夜擐。小兒奉親驢。野果采溪澗。勉使就微祿。未對涕先潛。觀汝兄弟意。豈復厭藜莧。兄歸弟不出。定省同夜旦。

一年老一年

一年老一年。一日衰一日。譬如東周亡。豈復須大疾。嬾惰已廢書。冊久病來亦復疎。盃酒輒車小住固自佳。拂袖便行亦何有。下床擁火暖有餘。鹹豆數粒粥一盂。平生常笑愚公愚。欲栽墮齒染白鬚。

自東岡繚出舍北

年光豈不好。老境獨無歡。百步未爲遠。一尊聊自寬。澤枯波尙綠。霜薄葉初丹。矯首問來雁。中原應苦寒。
有客

有客南山至。相攜飯野亭。傾籃魚白白。出籠菜青青。米滑溪舂碓。醅渾草塞瓶。從今同保社。日醉不須醒。
陳伯予見過喜予強健戲作

寒無氈坐飯生塵。此老年來乃爾貧。兩頰如丹君會否。胸中原自有陽春。
東陽郭希呂呂子益送酒

山崦尋香得早梅。園丁又報水仙開。獨醒坐看兒孫醉。虛負東陽酒擔來。
夜坐

家家績火夜深明。處處新畬雨後耕。常媿老身無一事。地爐堅坐聽風聲。
兩日意殊不憚作短歌自遣

一月得笑纔四五。十事敗意常八九。國中謾說無雙士。天下元無第一手。平生愛酒恨小戶。半世爲文真
弊帚。劫灰處處吊興亡。宿草年年哭交友。君看丈夫得意時。大冠如箕印如斗。一朝棄去豈復論。衣破何
妨露雙肘。有時采藥二室間。亦或釣魚五湖口。死來萬古一熟眠。安用虛名傳不朽。

戲書日用事

衰病時時作。閑愁日日生。寒添沽酒興。困喜磴茶聲。琴廢還重理。詩成更細評。殘年那望進。且復暢幽情。
獨立

上書不上登封書。乘車但乘下澤車。夕陽獨立衡門外。閑看村童學釣魚。

夢中江行過鄉豪家賦詩二首。既覺猶歷歷能記也。

築屋傍江臯。牆垣締結牢。深門蔭楊柳。高架引蒲萄。黍酒歡迎客。麻衫旋束條。兒孫勿遊惰。常念起家勞。

又

蒲席乘風健。江潮帶雨渾。樹餘梢纜迹。崖有刺篙痕。酒醉湘君廟。歌招屈子魂。客途嗟草草。無處采芳蓀。

病中夜思

一病輒兼旬。百憂集雙鬢。藥裹堆床滿。生意垂欲盡。時聞雀翻更。嚙中有栖雀。夜鳴爲翻更。頻看燈落燼。平生學六經。白首頗自信。拳拳服仁義。念念去驕吝。所覲未死間。猶有分寸進。

得子虞書言明春可歸

白首相依飽蕨薇。吾家父子古來稀。春秧出水柔桑綠。正是農時望汝歸。

雜賦

地爐夜熱麻黠煖。瓦甌晨烹豆粥香。不是有心輕富貴。從來吾亦愛吾鄉。

又

病叟胸中一物無。夢遊信脚到華胥。覺來忽見天窗白。短髮蕭蕭起自梳。

又

終日纔堪米一升。生涯略似草菴僧。溼薪不管晨炊晚。留得松肪代夜燈。

又

出門信步作閑遊。野廟村坊到處留。每伴樵夫嘗半舍。更隨牧豎采沿溝。牛舍沿溝皆果名。

又

體不佳時看周易。酒痛飲後讀離騷。騎驢太華三峯雪。鼓棹錢塘八月濤。

又

昔人莽莽荒丘裏。陳迹紛紛朽簡中。畢竟是非誰辨得。舉盃吾欲問虛空。

又

百億須彌理固有。八九雲夢何足吞。天下廣居君識否。一間茆屋寄孤村。

又

夢裏曾作南柯守。少時元是東陵侯。今朝半醉歸草市。指點青帘上酒樓。

又

七十八十古來稀。行年九十固應衰。已興工部耳聾歎。更和文公齒落詩。

又

中年畏病盃行淺。晚歲修真食禁多。謝客杜門殊省事。一盃香飯養天和。

又

齊民讓畔不爭桑。和氣橫流歲自穰。君看三山百家聚。更無一壠有遺蝗。今年蝗孽獨三山。過而不下。遂

不爲災。

又

得雨郊原已徧耕。東家西舍多逢迎。前山雲起樹無影。別潮浦生船有聲。

散懷

小疾便幽翳。孤懷抱鬱陶。遺文誦史漢。奇思探莊騷。談笑寬吟苦。經行慰作勞。東岡聊一往。突兀古臺高。

書壁

稻草高茨屋。繩樞窄作門。漁樵皆結友。鄰曲自通婚。留客秋茶苦。醺人社酒渾。餘年尙何歎。一飯亦君恩。

又

故里還初服。明恩念老農。方蒙鏡湖賜。又忝渭川封。炊粟猶支日。藏蔬可御冬。霜天病益減。高枕聽鄰鐘。

冬日齋中卽事

讀書雖所樂。置之固亦佳。燒香袖手坐。自足紓幽懷。我生本從人。豈願終不諧。其如定命何。生死一茆齋。

又

一帶常在傍。有暇卽掃地。旣省課童奴。亦以平血氣。按摩與導引。雖善亦多事。不如掃地法。延年直差易。

又

夙與人尙默。衆鳥相與言。小語豈不可。何至爾啾喧。吾獨擁燎爐。宿火有餘溫。澹然以自適。喧寂何足論。

又

詰朝澹無營。百事付童子。拂我架上書。注我硯中水。覓睡不復成。取衣乃徐起。卒歲如一朝。底處著愠喜。

又

我老苦寂寥。誰與娛晨暮。狸奴共茵席。鹿麕隨杖屨。歲薄食無餘。恨使鳥雀去。安得粟滿囷。作粥餽行路。

又

東園二畝地。重重作藩籬。我豈婦女哉。避客門不窺。要當盡徹去。來往無它歧。飯罷忌久坐。時須曳筇枝。

冬日排悶

老欲躬耕力弗強。但應賣藥似韓康。陳編時見古成敗。舊友不知今在亡。已返山林遺世事。尙憑詩酒答年光。此身自笑如稊米。加損寧能繫太倉。

又

地爐微火伴寒灰。垂野江雲暝不開。欲睡手中書自墮。半酣窗外雪初來。渡頭照影聞征雁。籬角吹香得早梅。佛粥春盤俱不遠。離離斗柄欲東回。

法雲寺主僧妙滿方作鐘樓未成

勾踐舊國古會稽。南山擁郭分東西。城門大路引繩直。西走百里皆平堤。客行欲曉到梅市。喔喔尙聽城中雞。法雲古寺臨大澤。風皺百頃青玻璃。迎來送往此其地。素壁時見前人題。乖離會合浩莫計。歷觀名氏空含悽。山僧慣見爲客歎。榮悴從來如夜旦。明年吾樓插天半。世事君須倚闌看。

自法雲歸

落日疎林數點鴉。青山闕處是吾家。歸來何事添幽致。小竈燈前自煮茶。

枯菊

龍山落帽未多時。陳迹依然使我悲。粲粲菊花何似好。堦前惟見束枯枝。

聞吳中米價甚貴二十韻

千錢得斗米。一斛當萬錢。嗟汝蚩蚩民。何恃以自全。我欲告父老。食爲汝之天。勿結迎神社。勿飾航湖船。築室勿斲削。但取垣屋堅。婦女省釵澤。野粧何用妍。趨利常處薄。衆役常在前。歲時相勞苦。盛饌一豚肩。近市可致酒。雖薄亦醺然。切勿慕公卿。早朝妨熟眠。亦勿謀高貲。貪吏不汝憐。有負固吹毛。無罪亦株連。豈暇論曲直。挺繁如登仙。短褐與飯豆。溫飽可終年。草廬挂葦箔。乃可數世傳。朱門雖赫赫。變化如飛煙。爲農最得策。本無祿與權。時平自逸樂。奉牲祭其先。不幸有散徙。均爲寓民編。吾詩不足徵。請讀七月篇。

寒夜偶懷壯遊書感

疇昔西遊萬里還。狂吟散落滿人間。買空綠水橋邊酒。看徧青城縣裏山。梅蕊疎疎春欲動。川雲漠漠雪猶慳。偶思五十年來事。顧影燈前自笑頑。

夢曾文清公

有道眞爲萬物宗。嶢然使我歎猶龍。晨雞底事驚殘夢。一夕清談恨未終。

睡覺

白日悠悠喜意平。夢中歷歷覺魂清。覺時不落晨雞後。靜待天窗一點明。

湖邊小聚

小聚遠塵囂。淳風獨未澆。鳴機燈煜煜。飲犢雨蕭蕭。異味常交致。新醪亦苦邀。人間交道絕。令我慕漁樵。

雨

秋冬久不雨。氣濁喜雲生。麥壘崇朝潤。茆檐徹夜聲。初來斷幽徑。漸密雜疎更。賴有牆陰薺。離離已可烹。

又

薄晚初沾灑。清晨更慘淒。魚寒拋餌去。鴉溼就簷栖。幽澗濺濺溜。長隄淺淺泥。一盃持自賀。吾事在鋤犁。

雨後快晴步至湖塘

齒豁從教道字訛。負薪陌上且行歌。古人亦自逢時少。吾輩何疑忤俗多。山掃黛痕如尙溼。湖開鏡面似新磨。亦知大有掀髯處。無奈西流白日何。

兩日寒雨作雪不成夜忽大雨遂晴

折木翻濤一夜風。浮雲吹盡日行空。天公豈是真慳雪。三白留來付臘中。

歲窮

困阨身如寄。推遷歲忽窮。百年均昨夢。萬古一飛鴻。夜甕鳴春酒。晨畦摘晚菘。屬饜童子笑。便腹負吾翁。

凍坐

湖海淒涼地。風霜慘淡天。吾其去道近。無酒亦陶然。

千金募戰士萬里築長城。何時青塚月。却照漢家營。

又

夜泊武昌城。江流千丈清。寧爲雁奴死。不作鶴媒生。

雪意復作

前日作雪風敗之。今日濃雲雪復作。一寒未暇自爲計。宿麥懸知天已諾。灞橋策驢愁露手。新豐買酒聊輒脚。胸中正著九雲夢。廊廟何加一丘壑。上書陳事固可笑。服藥求仙亦成錯。不如醉踏一劍騰風雲。跨海東謁青童君。

醉書

天公賦與五湖秋。風月雲煙處處留。損食一年猶可健。無詩三日却堪憂。

